

NANI KELE MELCHISEDEC YAYI?



Beto kulumusa bayintu ya beto samu na kisambu.

Tata ya Mazulu ya luzolu, beto ke na kuwa nkunga yayi ya *Kwikila Kaka*, ya ke sala beto kuzaba ti ya kele nyonso yina beto fwana sala samu na kubyadila bansilulu ya Nzambi, kukwikila kaka yawu. Samu ti ya kele ya kusonika, “Nyonso ke salama na bayina ke kwikila.” Na yina beto ke boka, mutindu bakala yina kuzwaka mwana ya kimbevo ya épilepsie, “Mfumu, mu ke kwikila! Sadisa kukondwa lukwikilu ya munu.”

² Beto ke tonda Nge samu na ngolo ya Nge ya nene, luzayikisu ya Nge ya nene ya Nge na beto na bilumbu yayi ya nsuka. Ya ke sala ti ntima ya beto kuvwanda ya kusepela mingi mpe kuvwanda na kyese mingi, na kuzaba ti beto me kota na ngwisani na Nzambi ya moyo; Yina ke siamisa yawu na banzikisa ya nzutu, mpe ya bima, mutindu Yandi salaka na bilumbu yina lutaka, mpe mutindu Yandi silaka samu na kilumbu yayi. Beto ke vutula matondo mingi na Nge, Nzambi ya beto. Na kilumbu yayi ya mpimpa kisika muntu mosi ve ke monana mutindu ti yandi zaba ve wapi nzila kukwenda, beto ke na kiese mingi ti beto me kuzwa kisika ya lukengelo, kisika ya kubumbama.

³ Ntangu yayi sakumuna beto na nkokila yayi, Mfumu, na yina beto ke zonzila Ndinga ya Nge. Mpe bansilulu yina ba pesaka beto, bika ti beto bumba yawu na kati ya bantima ya beto, kuzola yawu na buzitu, mpe kutumama na yawu na luzitu ya kieleka ya bunzambi. Samu beto ke lomba yawu na Nkumbu ya Yesu. Amen.

⁴ [Mpangi-bakala mosi ke tuba na Mpangi Branham—Mu.] (Oh, bawu zolaka ve kusala yawu. Dikabu ya zola? Bawu zolaka sala yawu ve. Bawu zolaka sala yawu ve. Nani salaka yawu? Ya kele beno me sala dyambu yango?) Mu vwanda tala na muyidiki. Yandi tubaka ti yandi bakaka dikabu ya zola samu na munu. Yandi zolaka sala yawu ve. Mu ke sepela na yawu, Nzambi zaba yawu, kasi mu—mu ke kwisaka ata fioti ve samu na yawu. Matondo na beno. Bika ti Mfumu sakumuna beno. Mu ke sala nyonso mu lenda sala. Mu ke tula yawu kaka na kisalu ya kumwangisa nsangu na bayinsi ya nzenza, na yina mu ke zaba ti ya ke kwenda samu na Kimfumu ya Nzambi. Mpe kana Mfumu kuzola, mu ke sadila yawu, munu mosi, kuna na bayinsi ya nzenza, samu na kunata Nsangu ya mbote mosi yayi, yina beno me kuwa sabala yayi, na yina mu zaba ti ya ke salama na mutindu yina beno me kwikila Yawu. Mfumu sadisa munu na kusala yawu.

⁵ Mu ke vutula matondo mingi samu na bayina me kwisa na sabala yayi, mpe samu na beno nyonso bantu yina kele ya

kuvukana dyaka na nkokila yayi na nsinga ya alo-alo. Mpe beto ke vutula matondo na mosi na mosi ya beno.

⁶ Billy tubaka na munu na suka yayi, yandi tubaka, “Papa, kana nge zolaka kwiza na munu na suka yayi, na suka-suka, kaka na manima ya nsemo ya kilumbu, mpe kutelama awa na nziunga na bisika yayi mpe kutala bamama yina ke na kupesaka madia na ba-bébé ya bawu na kati ya ditoma, bantu yayi ya mawa ya kuvwanda na kati ya mvula yina, ke na kuvingila bielo kuzibuka!” Beno me mona wapi mutindu ya muntu ya luvunu mu ke vwanda kana mu tuba na beno kima yankaka kasi Kieleka? Mu ke vwanda kieleka muntu ya yimbi. Bantangu yankaka mu fwana lwadisa, kasi ya kele ve samu ti mu zola, ya kele samu. . . Ya kele munu ve yina ke na kulwadisa. Ya kele Kieleka yina ke na kulwadisa. Mpe mu—mu. . . Kasi mu ke kwikila ti ya kele samu na yina beno ke kwizaka, samu ti mu ke na kieleka na beno, mpe ke sala nyonso yina mu lenda samu na kusadisa beno. Mfumu sadisa mosi na mosi ya beno.

⁷ Mpe ntangu yayi mu zola kutonda bantu samu na ngwisani ya bawu ya mbote, bantu ya mbanza awa, mpe, yina pesaka beto, yina sadisaka beto na kufutila na lukolo yayi, kivinga yayi ya nene mpe kivinga yayi ya ngalasise. Mpe mu zola kuvutula matondo na bantu yina yidikaka lukutakanu kana beno kele awa. Mpe dyaka mu zola kuvutula matondo na Thurston Colvin, yina kele mukengi awa, samu na ngwisani ya yandi ya mbote na kusadisa beto na kuzwa yayi mpe kuvwanda na beto na konso nkokila.

⁸ Beto ke vutula matondo na pulusu ya Jeffersonville samu na kukwisa awa mpe kukeba kisika yango, na ntalu mosi ya fioti mingi. Mu banza samu na ba-dollar zole na ngunga mosi, ti ba tulaka bapulusu awa na kisalu na mutindu ya kuswaswana, samu na kusungika matoma, samu na kumona ti ya vwandaka ve. . . kima mosi ve salamaka, mpe nyonso vwandaka mbote. Beto ke vutula matondo na bantu samu na yawu. Mpe na, mpe, ingénieur awa na tableau, mu me mona yandi. Mpe nyonso yina kele ya kuvukana na yayi, kieleka beto ke vutula matondo na beno.

⁹ Mu ke tonda mosi na mosi ya beno samu na makabu. Billy me natina munu, na manima ya midi yayi, dikabu mosi, mingi ya yawu, mpe ba-bwati, ya ba-bonbon, mpe nyonso yina. Mpe mosi ya bawu vwandaka Byese, na foto ya Klisto ba salaka na kati ya yawu, ya vwandaka na Dilongi na zulu ya Mongo. Mpe kieleka ya vwandaka kitoko. Kieleka mu ke tonda beno. Mpe bima mingi, mu zaba ve mutindu ya kutonda beno samu na yawu. Na yina, diaka, samu na nsimbisi ya beno—ya beno, na kusimbisaka balukutakanu na mbongo, ya kieleka beto me sepela na yawu, na ntima ya beto ya muvimba. Mfumu sakumuna mosi na mosi ya beno, ya kulutila mingi.

¹⁰ Billy tubaka, ya vwandaka na bantu mingi, beno lombaka ti beno vwanda na masolo ya kingenga na ntangu yina. Mpe mingi lombaka mpe vwandaka na mwa ba-bébé ya kubyeka. Oh, mutindu mu zola kusala yawu!

Kasi, beno me mona, ntangu mu me kwisa ntangu yayi, ya kele samu na dyambu ya nswalu mingi. Mu fwana vwanda ya kusungama, ntangu nyonso, mpe kulonguka Ndinga yayi na kisambu, samu na kunata Bansangu yayi. Beno me mona, bawu kele ve . . . Yawu kele—yawu kele ya kulutila samu na beto, samu ti ya kele kumona luzolo ya Nzambi mpe na manima kuzonzila bima. Mpe nyonso yina fwana kukutana kintwadi, mpe kulomba na Nzambi kaka yina mu fwana kulonga.

¹¹ Ntangu yayi, kana Mfumu zola, beto ke vutuka dyaka ntama ve, na ntangu beto ke kuzwa kilumbu mosi. Mu pesaka dibanza, to—to tubaka kima mosi samu na Paki. Mu ke sala mbote na kufyongonina yawu, samu ti mu banza ti mu kele na manaka na Californie samu na ntangu yina. Na yina ya lendaka vwanda luvunu. Na yina, ntangu beto ke vutuka diaka na tabernacle, beto ke tinda nge kalati mosi, mpe dibuundu, mpe—mpe kupesa beno kilumbu mpe ntangu. Na yina mu ke, mu banza na ntangu yina, diaka . . .

¹² Mu me kukubika dyaka ve ntangu mosi ya kusambila samu na bambevo. Beto me kuzwaka ve lukutakanu mosi yina beto me nataka bantu mpe ba me sambila samu na bawu. Beto me tindaka bawu na ngaanda. Mpe bampangi ya beto awa me longa, Mpangi Lee Vayle mpe Mpangi . . . Bampangi yankaka yayi me longa, mpe me sambila samu na bambevo, mpe me pesa mbotika ya masa, mbotika, mu zola kutuba, mpe me bika munu swi na Ndinga. Beto ke tonda bantu yayi. Ba me sala kosalu ya nene.

¹³ Ya kele na bankundi mingi awa yina mu ke zola kukutana. Mu ke tala na yisi mpe mu ke mona John mpe Earl. Mpe ya kele na Docteur Lee Vayle, mosi ya miyidiki ya campagne. Mpangi Roy Borders. Babakala yayi, mu me kuzwaka ntete ve . . . Mu me pesaka bawu ntete ve mbote. Mu me kuzwaka ntete ve siansi ya kusala yawu. Mu ke banza na bankundi ya munu ya Kentucky, mpe bisika nyonso awa, mpe bankundi ya milongi, mutindu mu ke zola kupesana mbote na bawu! Mpangi Blair, mu monaka yandi awa kilumbu yankaka yina. Mpe mingi ya bantu yina mu—mu ke zolaka, mpe ba vwandaka na balukutakanu mingi, mpe mu me pesaka bawu ntete ve mbote. Mu—mu ke na kumeka . . . Ya kele ve samu ti mu zola ve kusala yawu; ya kele samu ti mu kele ve na ntangu ya kusala yawu, mpe mu ke sala kaka mbangu.

¹⁴ Na kusakumunaka ba-bébé, ya kieleka. Mwana ya munu mosi, mutekolo ya munu ya bakala zolaka kusakumuka na lukutakanu yayi. Mu vwandaka ve na ntangu ya kusala yawu; David ya ntwenya. Mu kele nkooko ya bakala, mbala zole. Na yawu, Tata May, kana yandi kele awa na nkokila yayi, yina

pesaka munu nkawa yina, ya ke talana mutindu ti mu ke sadila yawu ntama mingi ve.

¹⁵ Na yawu, mpe mu tubaka na Billy, mu tubaka, “Biblia me tuba ‘beno fuluka mpe beno fulusa ntoto,’ kasi kizitu nyonso pesamaka ve na nge.” Mpe mitekoko yayi ke na kwisaka na mbangu mingi.

Mpe na yawu, beno bambuka moyo, bokilo ya munu ya kento vwandaka kisita, na kubanda. Yandi lendaka ve kuzwa bana. Mpe kilumbu mosi, na kukatukaka lukutakanu, Mfumu zonzaka na munu mpe mu tubaka, “Loyce, nge ke buta mwana ya bakala. Mfumu me sakumuna nge. Mpasi ya nge ya kento me kwenda.” Paul ya ntwenya butukaka, bangonda yivwa na manima.

¹⁶ Bangonda zole na ntwala bébé yayi kukwisa, mu vwandaka ya kuvwanda, mu vwanda kudya madya ya suka na suka mosi, na mesa, mpe Loyce mpe Billy vwandaka ya kuvwanda na lweka yankaka ya mesa na munu. Mpe mu monaka Loyce ke na kupesa madia na bébé mosi ya fioti ya kuinga na bulanketi ya rose . . . to ya bleu. Mpe Billy vwandaka ya kuvwanda na nsongi, ke na kudisaka Paul ya fioti. Mu tubaka, “Billy, mu me mona kaka vision mosi. Loyce vwanda disa bébé mosi ya kuinga na bulanketi ya bleu.”

Yandi tubaka, “Tala nzietolo ya munu ya kuzomba me kubwa na masa. Ya kele kaka bangonda yivwa me luta.”

Bangonda kumi na mosi na manima, David butukaka. Mpe mu vwandaka ve na lenda ya kusakumuna yandi na Mfumu ntete, mpe ke sala yawu ve tii ntangu beto ke vutuka dyaka. Na yina beno ke mona yina ya kele.

¹⁷ Mutindu mu ke zolaka bantu mpe kubundana ya bawu! Kasi bampangi ya beto vwandaka sambila samu na bambevo, mpe mu zaba ti ya kele lunungu. Konso nkokila beto vwandaka sambila samu na bambevo, mosi vwandaka tentika maboko ya bawu na zulu ya yankaka, beto nyonso kintwadi, yina sadisaka beto na kusimba kimvuka nionso. Kasi mu banza, kana Nzambi zola . . . Mu ke sonika yawu na kalati, kana beto tinda yawu. Na kuvutuka, mu ke zola kukubika pene ya bilumbu zole to tatu, dyaka, kaka samu na kusambila samu na bambevo mpe kusala yina beto lenda na mutindu yina. Ntangu yayi, mpe mu ke tonda bantu samu na lusalusu ya bawu, diaka.

¹⁸ Ntangu yayi mu zola kaka kupesa mulabu, kaka na mwa ntangu fyoti, na zulu—na zulu ya Nsangu ya suka. Ya kele ve na ntembe, mu me manisa yawu nionso ve, kasi mu banza ti beno me bakula. Mpe mu ke kwikila ti beno ve . . . Beno ke zaba ata fioti ve yina ya vwandaka samu na munu na kusala.

¹⁹ Ntangu yayi, ya ke monana ya kukikulumusanya mingi samu na beno. Kasi, beno, beno me mona yina beno ke na kusala? Beno ke na kubaka kisika ya Nzambi, samu na kutuba Kima mosi. Mpe ntete mu sala yawu, mvutu mosi fwana kwiza na Nzambi. Mpe

Yandi zolaka kulumuka, mpe Yandi me monana pwelele Yandi mosi, mpe me pesa Luzayikisu. Na yina, beno me mona, yayi kele samu na Dibuundu. Mpe beno bambuka moyo, mu tubaka, “Yayi, yina mu tubaka, vwandaka kaka samu na Dibuundu.”

²⁰ Mpe na yina beno lendaka tula kivuvu mpe kuzaba, yina vwandaka Nzambi mosi yina tubaka na munu kuna kisika ya vwandaka ve na mpadi, “Zonza, mpe tuba kisika bawu ke vwanda.” Mpe bambala tatu ya salamaka. Ntangu yayi, kana Yandi lenda na nzila ya Ndinga mosi yina kuvanga kima yina kele ve kuna, wapi mutindu Yayi ke simba mbote mingi na Kilumbu ya Lufundusu! Beno me mona? Bantu vwandaka kuna samu na kumona bima yayi, mpe kuzaba. Mutindu Paul tubaka, na bilumbu yina lutaka. Ya vwandaka na bantu na yandi, yina—yina kuwaka ntoto kuningana, mpe kuwaka ndinga ve, kasi bawu—bawu monaka Dikunzi ya Tiya.

²¹ Ya me sala munu mbote, ata ti, na manima ya me manisa, samu na kumona babakala ya makwela mpe bakento ya makwela, yina mu zaba kele Baklisto ya kieleka, yina ke na kuyambana mosi na yankaka mpe ke na kudila.

²² Mpe beno kuwa, bankundi, Nzambi ke siamisaka Ndinga ya Yandi na bidimbu mpe bansiamisa, samu na kusiamisa ti Yawu kele kieleka, Ndinga yina tubamaka. Ntangu yayi beno bambuka moyo, Nsemo yina vwandaka na Dituti yina, yina pesaka Luzayikisu . . .

Mu vwandaka . . . Mwa mwana ya munu ya kento vwandaka tuba na munu, Sarah awa, ti ntangu bawu . . . Lukolo yina kele kuna na Arizona vwandaka tala kuna na zulu ya kukondwa matuti, mpe na kumonaka Dituti yayi ya misitiki na mongo yina, ke mata mpe ke kulumuka, na Tiya ya mbwaki yina vwanda pela na kati ya Yawu. Mulongi sukisaka kalasi mpe lukolo, mpe basisaka bawu na ngaanda, mpe tubaka, “Beno me monaka ntete kima ya mutindu yina? Beno tala mutindu ya kele kuna.”

Beno bambuka moyo, ya kele Nsemo yango mosi ya mbwaki yina kele na zulu ya ditadi. Na yawu ya kele Nzambi mosi, Luzayikisu mosi, tubaka, “Tuba na bawu na kusala *yayi*.” Ya kele yina mu tubaka na beno na suka yayi, na yawu Ya kele.

²³ Kana ya salama ti nkundi ya munu ya mbote, Mpangi Roy Roberson, ke na kuwa na Tucson. Roy, nge ke bambuka moyo, kilumbu yina, vision yina nge monaka ntangu beto vwandaka kuna na zulu ya mongo? Nge kwizaka na munu, mpe Dituti yina vwandaka na zulu? Na kukulumukaka, nge zaba yinki Yandi tubaka na nge; mpe mu tubaka yawu na beno na yinzo, kilumbu yankaka yina? Kaka yina, Roy. Beno vwanda diaka ve na boma, mwana. Yimeni.

²⁴ Beno zaba kaka ve yina ya zola kutuba! Ya kele lemvo. Yandi ke zolaka beno. Mpe beno zola Yandi, beno sadila Yandi na kukikumusa nionso mpe beno sambila Yandi bilumbu ya beno

nionso. Beno vwanda na kiese, beno kwenda na ntwala mpe beno zinga mutindu beno kele. Kana beno kele na kyese, beno landila mutindu yina. Beno sala ata mbala mosi dyaka ve kima ya yimbi, mutindu yina. Beno kwenda kaka na ntwala. Ya kele lemvo ya Nzambi.

²⁵ Ntangu yayi mu zola kusambila dyaka ntete beto kota na Ndinga. Bantu yikwa ke sambila samu na munu? Mu ke kwenda kaka lukutakanu na lukutakanu. Beno ke sambila?

Beno zaba, mu ke zola yimbila beno mwa nkunga mosi, beto nionso kintwadi, na ntwala beto kwenda na Ndinga. Kaka na . . . samu ti beto kuzaba Nzambi. . . Kaka mwa mbiokolo. Beno me kuwaka ntete mwa nkunga yayi, *Yandi Ke Kebaka Nge?* “Na mwini mpe mawa, Yandi ke kebaka nge.”

²⁶ Mama yayi ya ntwenya ke kwisa na piano. Yandi ke tuba, mu zola vutula matondo na mwa mama yayi ya fioti, dyaka. Mu zabaka ve nani yandi vwandaka. Ya kele mosi ya bana ya bakento ya diacre awa. Kieleka mu . . . Mwana ya kento ya Mpangi Wheeler. Yandi me kuma mbuta ntangu yayi. Yandi vwandaka mwa kima ya fyoti yina vwandaka ya kuvwanda na dibolongo ya munu, ntama mingi ve, mpe ntangu yayi yandi kele kento mosi ya ntwenya. Na yawu ya kieleka mu ke tonda yandi ti yandi me sadila mayele ya yandi na miziki, mpe ntangu yayi yandi ke bula na malembe nionso. Nge zola pesa beto note, mpangi ya kento? Beto nyonso kintwadi ntangu yayi.

Yandi ke kebaka nge,
Yandi ke kebaka nge;
Na mwini to na mpimpa,
Yandi ke kebaka nge.

Beno zola yawu? Beto yimba dyaka yawu, beto nyonso kintwadi.

Yandi ke kebaka nge,
Yandi ke kebaka nge;
Na mwini to na mpimpa,
Yandi ke kebaka nge.

Mpangi Dauch, Yandi ke salaka samu na nge, mpe, Mpangi-bakala. Beno zola Yandi ve?

Beto kulumusa bayintu ya beto ntangu yayi.

²⁷ Nzambi ya luzolo ya Lemvo, na mwa noti yayi awa ya mwa bima samu na kutuba na bantu, mpe kuvutuka dyaka samu na kutala na suka yayi, samu ti ya kele yina bantu ke kwizaka kuwa. Mu ke sambila, Nzambi, ti Nge ke bika bantu kumona ti Nzambi zola mpe ke kebaka. Mpe ya vwandaka munu ve yina pesaka Yawu, Mfumu, ya vwandaka ya kusiamisa ti ya vwandaka Kieleka. Na yawu mu ke sambila, Nzambi ya Luzolo, ti zola ya Nge kuvwanda ntangu nyonso na kati-kati ya bantu. Na nkokila yayi, samu na kukabula na manima ya lukutakanu yayi mpe

kukwenda na bayinzo ya beto ya mutindu na mutindu, ya—ya ke benda beto, ndambu, ya mudindu, Mfumu. Mu ke sambila ti Nge sakumuna bantu yayi.

²⁸ Ntangu yayi na yina beto ke belama na Ndinga, na kisambu, mpe beto ke belama na Ndinga ya kusonama, beto ke lombi ti Nge ke baka Ndinga yayi me sonama mpe ke kumisa Yawu ya moyo na beto na nkokila yayi. Mpe ntangu beto ke katuka na kivinga yayi na nkokila yayi samu na kukabwana mpe kukwenda na bayinzo ya beto ya kuswaswana, bika ti beto tuba mutindu bayina katukaka na Emmaüs, bayina vwandaka tambula na Yandi kilumbu nyonso mpe kasi vwandaka zaba Yandi ve; kasi ntangu Yandi kotisaka bawu na kati ya kivinga na mpimpa yina, mpe myelo vwandaka nyonso ya kukanga, Yandi salaka kima kaka mutindu Yandi salaka ntete ba koma Yandi na kulunsi. Na yina, bawu zabaka ti Yandi vumbukaka diaka na lufwa.

Sala dyaka yawu na nkokila yayi, Mfumu. Pesa yawu, na ntangu myelo kele ya kukanga, mpe mwa nkonga ya Nge awa kele ya kuvwanda, na kuvingilaka. Mpe, Tata, ntangu beto ke kwenda na bayinzo ya beto, beto ke tuba mutindu bawu salaka, “Bantima ya beto vwandaka pela ve na kati ya beto na yina Yandi vwandaka zonga na beto na nzila!” Beto ke kukipesa beto mosi, mpe nyonso, na maboko ya Nge, Mfumu. Sala na beto mutindu Nge me mona kulunga. Na Nkumbu ya Yesu. Amen.

²⁹ Ntangu yayi beto kota mbala mosi na kisalu ntangu yayi, na nswalu. Na kubakaka ntangu yayi na munu, kana beno zola, na Buku ya Hébreux, mpe luzayikisu yankaka na zulu ya Nsangu. Beto ke zonzila kaka na mwa ntangu fyoti na nkokila yayi, kana Mfumu zola. Mpe kuna na yina beto ke tanga banzila tatu ya ntete ya Hébreux 7:1 tii 3, mpe na manima kupesa mulabu na zulu ya yayi. Mpe beto zaba ve yina Mfumu ke sala; beto zaba ve. Kima mosi kaka beto ke sala kele kukwikila kaka, beto tala mbote, beno sambila. Ya kieleka? Mpe beno kwikila ti “Yandi ke sala nyonso kutambula kintwadi samu na bumbote ya bayina ke zolaka Yandi,” samu ti Yandi silaka na bawu.

Samu ti Melchisédek yayi, ntinu ya Salem, nganga-Nzambi ya Nzambi ya zulu mingi, yina kutanaka na Abraham na kuvutukaka na bitumba yina yandi nungaka bantinu, mpe sakumunaka yandi;

Na yandi mpe Abraham pesaka kikunku ya kumi ya nyonso; na kuvwandaka na ntete landila lutendulu Ntinu ya ludedomo, mpe na manima ya yina mpe Ntinu ya Salem, yina kele, Ntinu ya ngemba;

Beto tanga fioti na ntwala.

Kukondwa tata, mama ve, dikanda ve, . . . mbandukulu ya bilumbu ve, to nsuka ya luzingu ve; kasi me sala mutindu na Mwana ya Nzambi; ke landila na kuvwanda nganga-Nzambi ntangu nyonso.

³⁰ Beno banza na Muntu yayi ya nene, mutindu Muntu yayi fwana vwanda! Mpe ntangu yayi, kyuvu kele, “Nani kele Muntu yayi?” Ba-théologien kele na mabanza ya kuswaswana. Kasi kubanda kuzibuka ya Bidimbu Sambwadi, Buku ya mansweki yina vwandaka ya mansweki samu na beto. . . Landila Apocalypse 10:1 tii na 7, mansweki nyonso yina kele ya kusonika na kati ya Buku yayi, bayina vwandaka ya kubumbama nzila nyonso ya nsungi ya basungiki, ya kele yina fwana monisama pwelele na nzila ya wanzio ya nsungi ya nsungi ya nsuka. Bantu yikwa zaba ti ya kele kieleka? Ya kele kieleka, ba zolaka nata bawu. Mansweki nionso ya Buku ya mansweki ke monisama pwelele na munati-nsangu ya Laodicée ya nsungi yina.

³¹ Na kumonaka ti ya kele na kuswana mingi samu na Muntu yayi mpe dilongi yayi, Mu banza ti ya me tala beto na kufiongonina yawu, samu na kutala Nani yayi kele. Ntangu yayi, ya kele na balukolo mingi ya kubanza na Yandi.

Mosi ya balukolo yina kele, ke tuba, “Yandi kele kaka disolo. Yandi vwandaka ve kieleka muntu.”

Mpe bantu yankaka ke tuba, ti, “Ya vwandaka kinganga-Nzambi. Ya vwandaka kinganga-Nzambi ya Melchisédek.” Ya kele na mingi ke ndimaka mutindu yina, yina ke kangama mingi na lweka yina kulutila bawu ke salaka na lweka yankaka, ya kele samu ti bawu ke tubaka ti ya vwandaka kinganga-nzambi.

Ya lenda vwanda ve mutindu yina, samu na nzila ya 4 Ya ke tuba ti Yandi vwandaka Muntu, “Muntu.” Na yawu, samu na kuvwanda Muntu, Yandi fwana vwanda na bumuntu, “Muntu.” Ya kele ve ntumunu; kasi Muntu! Na yawu Yandi vwandaka ve kaka lutumu ya kinganga-Nzambi, to dyaka ti Yandi vwandaka disolo. Yandi vwandaka Muntu.

³² Mpe Muntu yango kele ya Seko. Kana beno tala, “Yandi vwandaka na tata ve. Yandi vwandaka na mama ve. Yandi vwandaka na ntangu ve ti Yandi bandaka. Mpe Yandi vwandaka na ntangu ve ti Yandi sukaka.” Mpe ntangu nyonso Nani ya vwandaka dyaka moyo na nkokila yayi, samu ti Biblia ke tuba awa, ti, “Yandi vwandaka ve na tata, to mama, mbandukulu ya bilumbu, to nsuka ya luzingu.” Na yawu Ya zolaka vwanda Muntu ya Seko. Ya kele kieleka? Muntu ya Seko! Na yawu ya zolaka vwanda kaka Muntu mosi, ya kele Nzambi, samu ti Yandi kele Yandi yina kaka kele ya Seko. Nzambi!

³³ Ntangu yayi, na ya Ntete ya Timothée 6:15 mpe 16, kana beno zola kutanga yawu kilumbu mosi, mu ke zola ti beno tanga yawu.

Ntangu yayi, kima yina mu ke nwanaka kele, ti, Yandi vwandaka Nzambi, samu ti Yandi kele Muntu kaka yina lenda kufwa ve. Mpe ntangu yayi, Nzambi ke na kusobaka Yandi mosi na kati ya Muntu; ya kele yina Yandi vwandaka, “Tata ve, mama ve, ata mbandukulu ya luzingu ve, ata nsuka ya bilumbu ve.”

³⁴ Ntangu yayi beto ke tala na Masonuku ti bantu mingi ke longaka yawu, “nyonso tatu na kati ya Bunzambi.” Na yawu, beno lenda ve kuvwanda na bumuntu kukondwa kuvwanda muntu. Ya ke lomba muntu na kusala bumuntu.

Longi mosi ya Baptiste, na mwa basabala me luta, yandi kwisaka, mpe yandi tubaka, “Mu ke zola kusungika beno na Kinzambi ntangu yankaka ntangu beno ke kuzwa ntangu.” Bokilaka munu, mu zola kutuba.

³⁵ Mu tubaka, “Mu kele na ntangu kaka yayi, samu ti mu zola kuvwanda ya kusungama, mpe beto ke bika nyonso yankaka, samu na kusala yawu.”

Mpe yandi kwisaka, yandi tubaka, “Mpangi Branham, nge ke longaka ti ya kele kaka na Nzambi mosi.”

Mu tubaka, “Yinga, tata.”

Yandi tubaka, “Mbote,” yandi tubaka, “Mu ke kwikila ti ya kele na Nzambi mosi, kasi Nzambi mosi na kati ya Bantu tatu.”

Mu tubaka, “Tata, vutukila dyaka yawu.”

Yandi tubaka, “Nzambi mosi, na kati ya Bantu tatu.”

³⁶ Mu tubaka, “Wapi kisika nge kwendaka na lukolo?” Beno me mona? Mpe yandi tubaka na munu lukolo ya Biblia. Mu tubaka, “Mu lenda kwikila yawu. Beno lenda vwanda ve muntu kukondwa kuvwanda na bumuntu. Mpe kana beno kele na bumuntu, beno kele na bumuntu mosi samu na beno mosi. Beno kele ya kukabwana, mosi na mosi.”

Mpe yandi tubaka, “Mbote, ba-théologien lenda tendula yawu ve.”

Mu tubaka, “Ya kele na nzila ya luzayikisu.”

Mpe yandi tubaka, “Mu lenda ve kundima luzayikisu.”

³⁷ Mu tubaka, “Na yina ya kele ve na mutindu samu na Nzambi na kukuma na beno, samu ti, ‘Ya kele ya kubumbama na meso ya bantu ya ndwenga mpe ya mayela, mpe me monisama na bana ya fyoti,’ me monisama, apocalypse, ‘me monisama na bana yina zola kundima yawu, kulonguka.’” Mpe mu tubaka, “Ya ke vwanda ve na mutindu samu na Nzambi na kunata nge; nge ke kanga nge mosi na Yandi.”

Biblia ya muvimba kele luzayikisu ya Nzambi. Dibuundu ya muvimba kele ya kutunga na zulu ya luzayikisu ya Nzambi. Ya kele ve na mutindu yankaka na kuzaba Nzambi, kaka na nzila ya luzayikisu. “Na nani Mwana ke monikisa Yandi.” Apocalypse; nyonso kele luzayikisu. Na yina, na acide . . . ve samu na kundima luzayikisu, na yina beno kele kaka théologien ya madidi, mpe kivuvu kele ve samu na beno.

³⁸ Ntangu yayi, ntangu yayi, beto ke tala ti Muntu yayi “kuzwaka ve tata, ata mama ve, ata mbandukulu ya bilumbu to nsuka ya luzingu.” Ya vwandaka Nzambi, *en morphe*.

Ntangu yayi, mpova ke kwisa, mpova ya Grec, zola kutuba, “kusoba,” ba vwandaka sadila yawu, na kusobaka Yandi mosi, *en morphe*, katuka Muntu mosi na . . . muntu mosi, mpova ya Grec kuna, *en morphe*, zola kutuba . . . ba bakaka yawu na bansaka, ti muntu mosi ke na kusobisaka munganzi ya yandi, samu na kusala kisalu yankaka.

³⁹ Mutindu na—na lukolo, kaka ntama mingi ve, Mu ke kwikila, Rebecca, kaka na ntwala yandi kuzwa diplome, ba vwandaka na mosi ya bansaka ya Shakespeare. Mpe ntwenya mosi ya bakala zolaka soba bilele ya yandi bambala mingi, samu ti yandi salaka bitini zole to tatu ya kuswaswana; kasi, muntu mosi. Yandi basikaka, kilumbu mosi, yandi vwandaka vilain; mpe ntangu yandi basikaka ntangu vwandaka landa, yandi vwandaka muntu yankaka. Mpe ntangu yayi mpova ya Grec, *en morphe*, zola kutuba ti yandi “sobaka munganzi ya yandi.”

⁴⁰ Mpe ya kele yina Nzambi salaka. Ya kele Nzambi mosi ntangu nyonso. Nzambi na mutindu ya Tata, Mpeve, Dikunzi ya Tiya. Nzambi mosi yango kumaka nsuni mpe zingaka na kati-kati ya beto, *en morphe*, basisaka samu ti ba mona Yandi. Mpe ntangu yayi Nzambi mosi yango kele Mpeve-Santu. Tata, Mwana, Santu . . . Banzambi tatu ve; bisalu tatu ve, bisalu tatu ya Nzambi mosi.

⁴¹ Biblia ke tuba, “Ya kele na Nzambi mosi,” tatu ve. Kasi ya kele mutindu ti bawu zolaka ve . . . Beno lenda sungika yayi ve mpe kuzwa Banzambi tatu. Beno ke tekisa ata fioti ve yina na Juif. Mu ke tuba na beno yawu. Mosi yina zaba mbote, yandi zaba ti ya kele kaka na Nzambi mosi.

⁴² Beno tala, mutindu kisadi-biteki, yandi me bumbama, na munganzi na zulu ya yawu. Ya kele yina Nzambi salaka na nsungi yayi. Ya me bumbama. Bima yayi nionso me bumbama, mpe yina zolaka monisama pwelele na nsungi yayi. Ntangu yayi, Biblia ke tuba ti bawu ke monisama pwelele na bantangu ya nsuka. Ya kele mutindu kisadi-biteki bumbaka kitini ya yandi—ya yandi ya kisalu nyonso ya kufuka tii ntangu yandi ke katula munganzi na yawu mpe yawu yina.

Mpe ya kele yina Biblia vwandaka. Ya vwandaka kisalu ya Nzambi yina ba me fuka. Mpe ba bumbaka Yawu kubanda mbandukulu ya yinza, mpe dinsweki ya Yawu sambwadi. Mpe Nzambi silaka na kilumbu yayi, na nsungi ya dibuundu yayi ya Laodicée, Yandi zolaka katula munganzi na kima ya muvimba mpe beto lendaka mona Yawu. Wapi kima ya nkembo!

⁴³ Nzambi, *en morphe*, me bumbama na Dikunzi ya Tiya. Nzambi, *en morphe*, na kati ya Muntu yina ba ke bokilaka Yesu. Nzambi, *en morphe*, na kati ya Dibundu ya Yandi. Nzambi na zulu ya beto, Nzambi na beto, Nzambi na kati ya beto; Nzambi me kukikulumususa.

Kuna na zulu, ya santu, muntu mosi ve lendaka simba Yandi; Yandi vwandaka na zulu ya mongo, mpe ata kana kibulu mosi simbaka mongo, yandi zolaka kufwa.

Mpe kuna Nzambi kulumukaka mpe sobaka tenta ya Yandi, mpe kulumukaka mpe zingaka na beto, kumaka mosi ya beto. “Mpe beto simbaka Yandi,” Biblia me tuba. Timothée ya Ntete kapu 3:16, “Kukondwa ntembe dinsweki ya lukwikilu ya beto kele nene; samu ti Nzambi kumonisamaka na nsuni, ya kusimbamaka na maboko.” Nzambi kudyaka musuni. Nzambi kunwaka maza. Nzambi lalaka. Nzambi dilaka. Yandi vwandaka mosi ya beto. Kitoko, kifwanukusu na Biblia!

Yina vwandaka Nzambi na zulu ya beto; Nzambi na beto; ntangu yayi ya kele Nzambi na kati ya beto, Mpeve-Santu. Muntu ya tatu ve; Muntu mosi kaka!

⁴⁴ Nzambi kulumukaka mpe kumaka nsuni, mpe kufwaka lufwa, na kati ya Klisto; samu ti Yandi sukula Dibuundu, samu na kukota na Yawu, samu na kubundana. Nzambi zola kubundana. Ya kele samu na yina Yandi salaka muntu na mbala ya ntete, ya vwandaka samu na kubundana; Nzambi zingaka yandi mosi, na Bakeluba.

⁴⁵ Mpe beno tala ntangu yayi, Yandi salaka muntu, mpe muntu kubwaka. Na yawu Yandi kulumukaka mpe vulusaka muntu, samu ti Nzambi zola ba sambila Nzambi. Mpova yayi *nzambi* zola kutuba “kima ya kusambila.”

Mpe yayi yina ke kwiza na kati-kati ya beto, mutindu Dikunzi ya Tiya, mutindu kima yina ke sobaka bantima ya beto, ya kele Nzambi mosi yina tubaka, “Ti nsemo kuvwanda,” mpe kuna nsemo vwandaka. Yandi ke mutindu mosi mazono, bubu yayi, mpe kukonda nsuka.

⁴⁶ Ntangu yayi, na mbandukulu Nzambi zingaka yandi mosi, na binama ya Yandi, mutindu mu zonzilaka na suka yayi. Yina kele mabanza ya Yandi. Ya vwandaka ve na kima mosi, kaka Nzambi kaka, kasi Yandi vwandaka na mabanza.

Kaka mutindu mutungi ya nene ya masuwa lendaka vwandisa, na mabanza ya yandi, mpe kubasisa yina yandi ke banza ya kele, yandi ke—ke na kutunga. Kuvanga, ntangu yayi, yandi lenda vanga ve. Yandi lenda baka kima yina ba vangaka mpe kusala yawu na mutindu yankaka; samu ti Nzambi kele mutindu kaka. . . Yandi mosi kaka lenda kuvanga. Kasi yandi ke kota na dibanza ya yandi yina yandi ke sala, mpe yina kele mabanza ya yandi, yina kele bansatu ya yandi. Ntangu yayi ya kele dibanza, mpe kuna yandi ke zonza yawu, mpe ya kele ndinga kuna.

⁴⁷ Mpe ndinga kele dibanza, ntangu yawu ke tubama, yawu kele ndinga. Dibanza yina me tubama kele ndinga, kasi ya fwana vwanda dibanza ya ntete. Na yawu, ya kele binama ya Nzambi; na manima ya me kuma dibanza, kuna ndinga.

48 Beno tala. Bayina kele na yawu, na nkokila yayi, Luzingu ya Kukonda nsuka, vwandaka na Yandi mpe na kati ya Yandi, na dibanza ya Yandi, ntete ya vwanda na Wanzio, mbwetete, Keluba, to kima yankaka. Ya kele ya Seko. Mpe kana beno kele na Luzingu ya Seko, beno vwandaka ntangu nyonso. Ve moyo ya beno awa, kasi mutindu mpe nzutu ti Nzambi ya seko . . .

49 Mpe kana Yandi kele ve ya seko, Yandi kele ve Nzambi. Nzambi fwana vwanda ya seko. Beto kele na nsuka; Yandi kele ya seko. Mpe Yandi vwandaka bisika nionso, yina zaba nionso, mpe yina kele na ngolo nionso. Kana Yandi kele ve mutindu yina, na yina Yandi lenda vwanda Nzambi ve. Yandi zaba bima nionso, bisika nionso, samu Yandi kele bisika nionso. Kuzaba nionso ke salaka ti Yandi vwanda bisika nionso. Yandi kele Kivangu; Yandi kele ve mutindu mupepe. Yandi kele Kivangu; Yandi ke zingaka na yinzo. Kasi na kuzabaka nionso, na kuzabaka bima nionso, ke sala ti Yandi kuvwanda bisika nionso, samu Yandi zaba nionso yina ke salama.

Ya lenda vwanda ve na nzinzi yina ke bweta meso ya yandi kukondwa Yandi zaba yawu. Mpe Yandi zabaka yawu na ntwala yinza kuvwanda, bambala yikwa yandi ke bweta meso ya yandi, bamafuta yikwa yandi ke vwanda na yawu, ntete yinza kuvwanda. Ya kele seko. Beto lenda bakula yawu ve na mabanza ya beto, kasi ya kele Nzambi. Nzambi, ya seko!

50 Mpe beno bambuka moyo, beno, meso ya beno, ntela ya beno, nyonso yina beno vwandaka, beno vwandaka na mabanza ya Yandi na mbandukulu. Mpe kima mosi kaka beno kele kele nzonzolo, ndinga. Na manima Yandi banzaka yawu, Yandi tubaka yawu, mpe beno bawu yayi. Kana ya kele ve mutindu yina, kana beno vwandaka ve na kati ya dibanza ya Yandi, ya kele ve na mutindu samu beno vwanda kuna, samu ti Yandi kele Yina ke pesaka Luzingu ya Kukonda nsuka.

51 Beno ke bambuka moyo mutindu beto me tanga Masonuku? “Ve yandi yina zola, to yandi yina ke kima, kasi Nzambi!” Mpe ti nsodolo ya Yandi lendaka vwanda kieleka, Yandi lendaka soola, na ntwala ya konso ntangu yina. Nani . . . Nzambi kele na kimpwanza na nsodolo ya Yandi. Beno zaba yawu? Nzambi kele na kimpwanza.

Nani vwandaka kuna samu na kutuba na Yandi mutindu ya kulutula mbote samu na kusala yinza? Nani ke meka na kutuba na Yandi ti Yandi vwandaka sala kusalu ya yimbi?

Mpe Ndinga mpe—mpe, Yawu mosi, kele kaka na kimpwanza. Mpe luzayikisu kele na kimpwanza. “Yandi ke monikisa na nani Yandi ke monika.” Luzayikisu ya kieleka, yawu mosi, kele kimpwanza na Nzambi. Ya kele mutindu yina bantu ke bulaka na bima, mpe ke dumukaka na bima, mpe ke bula na bima, kukondwa kuzaba yina bawu ke na kusala. Nzambi kele na kimpwanza na bisalu ya Yandi.

⁵² Ntangu yayi beto ke mona Yandi na mbandukulu, binama ya Yandi. Mpe, ntangu yayi, beno vwandaka na Yandi kuna. Na yina ya kele ntangu Buku ya Luzingu ke talana.

Ntangu yayi, beto ke tanga awa na Apocalypse kapu 13, na nzila ya 8, ti, “Kibulu yina ke kwizaka na zulu ya ntoto,” na bilumbu ya nsuka yayi, “ke vuna bantu nyonso yina kele na zulu ya ntoto bayina bankumbu vwandaka ve ya kusonama na Buku ya Luzingu ya Mwana-dimeme na ntwala ya mbandukulu ya yinza.”

⁵³ Beno banza na yawu! Na ntwala ya mbutukulu ya Yesu, bamvula mafunda yiya ntete Yandi kwiza na zulu ya ntoto, mpe bamvula mingi na ntwala beno kwisa na zulu ya ntoto, Yesu, na dibanza ya Nzambi, kufwaka samu na masumu ya yinza, mpe Buku ya Luzingu salamaka, mpe ba tulaka nkumbu ya beno na Buku yango ya Luzingu, ntete mbandukulu ya yinza. Ya kele Kieleka ya Biblia. Beno me mona, ba tumaka nkumbu ya beno na Nzambi mpe tulaka yawu na Buku ya Luzingu na ntwala ya mbandukulu ya yinza.

⁵⁴ Beno vwandaka kuna na binama ya Yandi. Beno ke bambuka moyo na yawu ve, ve, samu ti beno kele kaka kitini ya Luzingu ya Yandi. Beno kele kitini ya Nzambi ntangu beno ke kuma mwana-bakala to mwana-kento ya Nzambi.

Kaka mutindu beno kele kitini ya tata ya beno na ntoto! Ya kele kieleka. Beno kele. . . Bakala ke nataka hemoglobine, menga. Mpe ntangu yina kwendaka na—na diki, na yawu beno me kuma kitini ya tata ya beno; mpe mama ya beno kele kitini ya tata ya beno, mpe; na yawu beno nyonso kele kitini ya tata ya beno.

Nkembo! Yina ke basisa denomination na ngaanda, na mutindu nionso. Uh-huh. Ya kieleka ya ke sala yawu! Nzambi, na nionso, kisika mosi kaka!

⁵⁵ Beno tala ntangu yayi kinama ya Yandi. Na yina kinama vwandaka, ntete, Nzambi; dibanza, kinama yawu mosi, nionso na kati ya Mosi, kukondwa kutalisama. Na yina ntangu Yandi tubaka, na nzila ya zole, Yandi kumaka kuna Ndinga. “Mpe na manima Ndinga kumaka nsuni mpe zingaka na kati-kati ya beto.”

⁵⁶ Santu Jean kapu ya 1te mpe nzila ya 1te, beno tala, yayi kele, “Na mbandukulu.” Kasi, ntete, ya Seko! Beno tala, “Na mbandukulu vwandaka Ndinga.” Ntangu ntangu bandaka, yawu vwandaka Ndinga. Kasi na ntwala yawu vwanza Ndinga, yawu vwandaka kinama, dibanza mosi. Na yina ba zonzaka yawu, “Na mbandukulu vwandaka,” nzonzolo, “Ndinga.”

Ntangu yayi beto ke na kukuma kisika Melchisédek kele. Ya kele Muntu ya mansweki yayi. “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.” “Mpe na manima Ndinga kumaka nsuni

mpe zingaka na kati-kati ya beto.” Beno simba yawu kuna ntangu yayi, beno tala.

⁵⁷ Moyo ya Yandi—ya Yandi vwandaka Mpeve, Nzambi, ya kimpeve, mbote mingi, Seko ya nene. Ya zole, Yandi bandaka na kukuma Yandi mosi na nsuni, na kati ya *théophanie* ba ke bokila yawu, “Ndinga, nzutu.” Yayi na manima kele ntela ya Yandi vwandaka na kati ntangu Yandi kutanaka na Abraham, yina ba me bokila Melchisédek. Yandi vwandaka na mutindu ya *théophanie*. Ntangu yayi, beto ke kuma na yawu mpe ke lakisa yawu na baminuti fyoti, kana Mfumu zola. Yandi vwandaka Ndinga.

⁵⁸ *Théophanie* kele kima yina beno lendaka ve kumona. Ya lendaka vwanda kaka awa ntangu yayi, kasi beno lenda ve kumona yawu.

Ya kele kaka mutindu, mbote, mutindu televizio. Ya kele na kitezo yankaka. Televizio; bantu ke na kutambula kaka na kati ya kivinga yayi ntangu yayi, ke na kuyimba; ya kele na bantinta, mpe. Kasi disu kele kaka ya kutumama na ba-sense tanu. . . . Moyo ya beno nyonso kele kaka ya kutumama na ba-sense tanu, mu zola kutuba. Mpe beno kele kaka ya kukangama na yina meso ya beno fwana kumona. Kasi ya kele na kitezo yankaka yina ba lenda mona na nzila ya kusoba, na nzila ya televizio.

⁵⁹ Ntangu yayi, televizio ke salaka ve foto. Televizio ke nataka yawu kaka na circuit, mpe na manima écran ya televizio ke baka yawu. Kasi foto kele kuna, na kubanda. Televizio vwandaka awa ntangu Adam vwandaka awa. Televizio vwandaka awa ntangu Elie vwandaka ya kuvwanda na zulu ya Mongo Carmel. Televizio vwandaka awa ntangu Yesu ya Nazareth tambulaka na kumu ya Galilée. Kasi beno ke na kupesa kaka yawu ntangu yayi. Bawu zolaka ve kukwikila yawu na manima kuna. Beno zolaka vwanda kilawu samu na kutuba kima mutindu yina. Kasi ntangu yayi ya me kuma kieleka.

Mpe mutindu mosi ya kele, ti Klisto kele awa, Bawanzio ya Nzambi kele awa. Mpe kilumbu mosi, na Millenium ya nene ke kwisa, ya ke vwanda kaka kieleka kulutila televizio to kima yankaka, samu ti bawu kele awa.

⁶⁰ Yandi ke monika Yandi mosi na mutindu ya Yandi ya nene ya yina Yandi tubaka, mutindu Yandi *en morphes* Yandi mosi na kati ya bisadi ya Yandi mpe ke kukitalisa Yandi mosi.

⁶¹ Ntangu yayi, awa Yandi kele na mutindu ya Mpeve. Mpe kuna Yandi ke kwisa na mutindu ya . . . *en morphe*. Ntangu yayi, Yandi monikaka na Abraham, *en morphe*. Ntangu Abraham vwandaka vutuka na bitumba yina yandi nungaka bantinu, awa kwisaka Melchisédek, tubaka na yandi.

⁶² Kilumbu yina na zulunale ya Tucson, mu vwandaka tanga mukanda ti kisika ya vwandaka na kento mosi vwandaka nata ditoma na bala-bala, Mu ke kwikila pene ya bakilometele

makumi sambanu, to makumi nana na ngunga mosi, mpe yandi tutaka bakala mosi ya kiboba yina lwataka kazaka mosi. Yandi bokaka mpe telemisaka ditoma ya yandi. Ya losaka yandi na zulu. Kuna na ntoto ya kuyuma! Mpe yandi vutukaka mbangu samu na kutala yandi, mpe yandi vwandaka kuna ve. Na yina yinki yandi salaka? Bantu yankaka na manima ya yandi monaka yawu me salama, ba monaka bakala mosi ya kiboba ba me losa na zulu, mpe kazaka ya yandi ke baluka. Na yina bawu vutukaka mbangu samu na kutala. Bawu lendaka ve kumona bakala yango kisika mosi kuna. Bawu bokilaka bapulusu. Bapulusu kwisaka samu na kutala kisika yango; ya vwandaka ve na muntu kuna.

⁶³ Mbote, mosi na mosi ya bawu pesaka kimbangi, “Ditoma me dumuka na zulu, me bula muntu yango. Yandi me dumuka na zulu, mpe muntu nyonso me mona yawu.” Bambangi, zole to tatu na kati ya matoma, bawu monaka yawu me salama. Beto bakulaka ti, bamvula tanu me luta, ya vwandaka na bakala mosi ya kiboba na kazaka, yina ba tutaka mpe kufwaka na kisika mosi yina.

Ntangu beno ke katuka awa, beno kele ya kufwa ve. Beno fwana vutuka, mpe kana beno kele musumuki, mpe kufundisa beno landila bisalu beno salaka na kati ya nzutu. “Kana tabernacle ya ntoto yayi me beba, beto kele na mosi yina ke na kuingila.” *En morphe*, ya kele ndinga.

⁶⁴ Ntangu yayi, Nzambi, na kitezo yayi ya . . . Ya kele kitezo yayi ya ngidikulu ya Yandi, na manima salamaka na kati ya nsuni, Yesu. Na yinki? Kubanda na mbandukulu ya nene, Mpeve, na manima kulumukaka samu na kuvwanda Ndinga, samu na kutalisama Yawu mosi. Ndinga ke salaka ntete ve Yawu mosi, ya kele kaka ya kutuba, *en morphe*, na manima Yandi me kuma nsuni, Yesu, yina ke kufwa, samu na kumeka lufwa samu na beto nyonso misumuki.

⁶⁵ Ntangu Abraham kukutanaka na Yandi, Yandi vwandaka Melchisédek. Yandi ke zibuka awa yina binama nionso ke sala na nsuka ya nsuka, mwana nionso ya Abraham. Konso mwana ya Lukwikilu kieleka ke sala kima mutindu mosi. Kasi mu zola kutala mbote mutindu beto fwana kukwiza.

⁶⁶ Mpe, beto ke mona Yandi me monisama awa na Ruth mpe—mpe Boaz, mutindu Tata Mukudi, mutindu Yandi zolaka kwiza kuvwanda muntu.

⁶⁷ Ntangu yayi beto ke mona bana ya babakala ya Mpeve ya Yandi, me kota ntete ve na nzutu ya Ndinga . . . kasi . . . théophanie. Nzutu *yayi* kele ya kutumama na Ndinga mpe ya kukwikama . . . na kuingilaka ya kukwikama, kusoba ya nzutu.

⁶⁸ Ntangu yayi, luswaswanu na kati-kati ya Yandi mpe beno, mutindu mwana. Beno me mona, Yandi vwandaka, na mbandukulu, Ndinga, nzutu ya *en morphe*. Yandi kotaka mpe zingaka na kati ya yawu, na kati ya Muntu ya Melchisédek.

Na yina, na manima, beto kuwaka dyaka ve Melchisédek, samu ti Yandi kumaka Yesu Klisto. Melchisédek vwandaka Nganga-Nzambi, kasi Yandi kumaka Yesu Klisto. Ntangu yayi, beno luta na lweka ya yawu. Samu ti, na mutindu yina, Yandi zabaka bima nyonso, mpe beno me vwandaka ntete ve na lenda ya kuzaba yawu.

Beno ke kwiza mutindu Adam, mutindu munu, beno ke kuma katuka kinama ya nsuni, samu na kumekama. Kasi ntangu luzingu yayi me suka awa, “Kana tabernacle ya ntoto yayi kubeba, beto kele na mosi yimeni yina ke na kuingila.” Ya kele kisika beto ke kwenda; ya kele Ndinga. Na manima beto lenda tala na manima mpe kumona yina beto salaka. Ntangu yayi beto ke bakula yawu ve. Beto me kuma ata fioti ve Ndinga; beto me kuma kaka muntu yina kele na nsuni, Ndinga ve.

⁶⁹ Kasi, mpe beno tala, na pwelele ya ke sala yawu pwelele, beno ke vwanda ata mbala mosi ve Ndinga kana ti beno vwandaka dibanza na mbandukulu. Yina ke lakisa nsodolo ya Nzambi. Beno me mona? Beno lenda vwanda ve Ndinga kana ti beno kele ve dibanza. Beno zolaka vwanda na kati ya dibanza, ntete.

Kasi, beno me mona, samu na kutelama na mpukumunu, beno zolaka luta théophanie. Beno fwana kulumuka awa na nsuni, samu na kumekama na nzila ya disumu. Mpe kuna, kana beno telama, “Bayina nyonso Tata pesaka Munu ke kwiza na Munu, mpe Mu ke vumbula yandi na bilumbu ya nsuka.” Beno me mona, beno zolaka vwanda ntete.

⁷⁰ Mpe na yina, beno me mona, Yandi kulumukaka, na nzila ya ntangu nionso, na kinama ya . . . Ntete mbandukulu ya yinza, ba me tula nkumbu ya Yandi na Buku ya Luzingu ya Mwana-dimeme. Kuna, na yina, Yandi kumaka Ndinga, théophanie, yina lendaka monana, ke zimbana. Mpe kuna Yandi kumaka nsuni mpe vutukaka dyaka, vumbukaka nzutu yango mosi na mutindu ya nkembo.

Kasi beno luta théophanie mpe kumaka muntu ya nsuni, samu na kumekama na nzila ya disumu. Mpe kuna, “Kana tabernacle ya ntoto yayi me beba, beto kele na mosi yimeni yina ke na kuingila.” Beto kele ntete ve na banzutu.

⁷¹ Kasi, beno tala! Ntangu nzutu yayi ke kuzwa Mpeve ya Nzambi, Luzingu yina ke kufwaka ve na kati ya beno, ya ke losa nzutu yayi na lutumu ya Nzambi. Alleluia! “Yandi yina me butuka na Nzambi ke salaka disumu ve; yandi lenda ve kusumuka.” Romaines 8:1, “Na yawu ya kele na ata kitumbu samu na bayina kele na kati ya Klisto Yesu; bawu ke tambula ve landila nzutu, kasi landila Mpeve.” Beno bawu yayi. Beno me mona, yina ke losaka nzutu ya beno dilongi.

Beno fwana tuba ve, “Oh, kana mu lendaka kaka kubika kunwa! Kana mu lendaka kaka . . .” Beno kota kaka na kati

ya Klisto, mpe yawu nyonso me kwenda, beno me mona, beno me mona, samu ti nzutu ya beno kele kima ya Mpeve. Ya kele dyaka ve dyambu na bima ya yinza; ya kele ya kufwa. Ba kele ya kufwa; ba me zika masumu ya beno na mbotika, mpe beno kele kivangu ya malu-malu na Klisto. Mpe nzutu ya beno, kukuma ya kutumama na Mpeve, kumeka kuzinga luzinga ya mbote.

⁷² Mutindu beno bakento ke tubaka ti beno kele na Mpeve-Santu, mpe beno ke basika awa mpe ke lwata bakupe mpe nyonso, wapi mutindu beno lenda sala yawu? Wapi mutindu Mpeve ya Nzambi na kati ya beno lendaka bika beno kusala kima ya mutindu yina? Ya lenda vwanda kaka ve mutindu yina. Kieleka, ya lenda vwanda ve. Yandi kele ve mpeve ya mvindu; Yandi kele Mpeve-Santu.

⁷³ Mpe kuna ntangu beno ke kuma muntu na Mpeve yina, ya ke losa moyo ya beno nyonso na kuvwanda ya kutumama na Mpeve yina. Mpe Mpeve yina kele kima mosi ve na yinza kasi Nkuna yayi Ndinga me monisama, to me kindisama, alleluia, me kuma ya moyo. Mpe ntangu Biblia ke tuba, “Kusala *yayi* ve,” nzutu yayi na nswalu ke tumama na Yawu. Ya kele ve na kyuvu.

Mpe yinki ya kele? Ya kele ndandu ya mvumbukulu. Nzutu yayi ke vumbuka dyaka, samu ti ya me banda yimeni. Ya vwandaka ntete ya kukangama na disumu, na poto-poto mpe kubeba, kasi ntangu yayi yandi kele na ndandu; yandi me kuma ya Mazulu. Ntangu yayi, yina kele ndandu ti beno ke kwenda na Enlevement. Ya kele ndandu.

⁷⁴ Muntu ya kubela yina kele ya kulala, ke na kufwa, kima ve me bikana kasi lufwa; kaka yina lenda salama. Mu me monaka bivudi ya bantu, me kudia na cancer mpe tuberculose; mpe kumona bantu yayi, na mwa ntangu fioti na manima ya yina, na mavimpi ya mbote mpe ya ngolo. Kana ya kele ve na kubeluka ya Kinzambi, na yina ya kele ve na mvumbukulu, samu ti kubeluka ya Kinzambi kele ndandu ya mvumbukulu. Amen!

⁷⁵ Beno zaba yinki kele ndandu, mutindu yina ve? Ya kele avance. “Yandi lwalaka samu na masumu ya beto; na bamputa ya Yandi beto me beluka.” Beno tala mutindu ya kele mbote mingi! Beto zola Yandi.

⁷⁶ Ntangu yayi, nzutu yayi kele kima ya Mpeve. Beto me kotaka ntete ve na mutindu ya Ndinga, kasi beto kele dyaka na kati ya nzutu, kasi dyambu na Ndinga. Lufwa na nsuni ke nata beto kuna.

⁷⁷ Kaka kima mutindu mosi, beno banza na mwa bébé mosi. Beno lenda baka kento mosi, ata mutindu yimbi yandi kele, ntangu yandi me kuzwa kivumu mpe me kubama na kuvwanda mama. Beno tala mbote, ntete bébé yina kubutuka, mu ke kipe ve mutindu kento kele yimbi, yandi ke kuma kieleka mutindu ya mbote. Ya kele na kima mosi samu na yandi. . . yina ke monana ya busantu, samu na mama yina ke zola kukuma mama, na

nzila ya bébé yango. Samu na yinki ya kele? Mwa nzutu yina, ntangu yayi, ya kele ntete ve moyo, beno me mona, kima kaka ya kele kaka nsuni mpe misisa. Mwa kudumuka yina, ya kele kaka misisa yina ke na kuningana. Kasi ntangu ya ke basika na kivumu, Nzambi ke pema mupepe ya luzingu na kati ya yawu, mpe na manima yandi ke boka. Beno me mona, kaka mutindu—mutindu kieleka ya kele na nzutu ya kimuntu yina ba me sala, ya kele na nzutu ya kimpewe na kuzwa yawu ntangu kaka ya ke kuma awa.

⁷⁸ Na yina, ntangu muntu me butuka mbala zole, na Mazulu, yandi me kuma mwana ya bébé na Klisto.

Mpe, na yina, ntangu robe yayi ya nsuni me kubwa, ya kele na nzutu ya kimuntu, théophanie, nzutu ya kusala ve na maboko, to dyaka ya kubutama na kento, ti beto kwenda.

Na yina nzutu yina ke vutuka mpe ke baka nzutu ya nkembo.

Ya kele samu na yina Yesu kwendaka na difelo ntangu Yandi kufwaka, mpe longaka na myoyo yina vwandaka na boloko; me vutuka na théophanie yango. Oh, ya kuyituka! Matondo na Nzambi!

⁷⁹ Ya Zole ya Corinthiens 5:1, “Kana nzutu ya ntoto yayi kubeba, tabernacle ya ntoto yayi, beto kele na mosi yankaka.” Beno me mona, beto me luta na lweka ya yawu, samu na kukwisa ya kusungama na Nzambi, kinama; samu na kuvwanda nsuni, samu na kumekama mpe ya kumekama na disumu, mutindu Adam salaka. Kasi ntangu kumekama ya Ndinga ya Yandi me luta, na yina ba me nata beto na nzutu yayi yina ba yidikaka samu na beto ntete mbandukulu ya yinza. Ya kele Ndinga kuna yina beto me dumuka, samu na kwiza kaka pene-pene, na yisi awa samu na kumekama mpe ya mekamaka. Kana beto lutila na yawu, ya zolaka vwanda ve na mpukumunu; beto zolaka zaba bima nyonso. Ya kele samu na yina Yesu zabaka bima nyonso, samu ti Yandi vwandaka Ndinga ntete Yandi kuvwanda nsuni. Na manima beto me kuma Ndinga.

⁸⁰ Awa ba me sala beto na kifwanusu ya Ndinga, samu na kuvwanda muntu yina ke kota na Ndinga, yina ke kudya na Ndinga, na nzila ya kuvwanda ya kusoola na ntuala kubanda na mbandukulu. Beno ke mona mwa minzenzi yina ya Luzingu yina beno vwandaka na yawu na kati ya beno kubanda na mbatukulu, ntangu beno bandaka na nzietelo ya beno? Mingi ya beno lenda bambuka moyo na yawu. Beno me kota na dibuundu *yayi* mpe me kuma ya dibuundu *yina*, beno ke meka *yayi* mpe *yina*; kima mosi ve ke sepelisa. Ya kele kieleka. Kasi kilumbu mosi beno me zaba Yawu. Ya kieleka.

⁸¹ Nkokila yankaka yina mu vwandaka longa kisika mosi kuna, mu banza ti ya vwandaka kuna na Californie to na Arizona, na . . . Mu banza ti mu me tuba na mwa disolo yayi awa, samu na bakala yina me vwanda nsusu ya kento mpe me kuzwa diki ya

ngononi na nsi ya yawu. Mpe ntangu ngononi yango kubutaka, yandi vwandaka ndeke ya kulutila kitoko yina bana ya bansusu kumonaka ntete. Kasi, yandi belamaka. Yandi vwandaka—yandi vwandaka muntu ya yimbi na kati-kati ya bawu, samu yandi lendaka kaka ve kubakula wapi mutindu ti nsusu ya kento lendaka kukokula mpe kusanda na zulu ya kinkuku ya fumier mpe kudia yawu. Yandi lendaka ve kuzwa dibanza. Yandi zolaka tuba, “Kwiza mpe sala feti, cheri!” Kasi yandi—yandi vwandaka ngononi; yandi kudiaka kaka ve mutindu yina. Ya vwandaka ve madia ya yandi.

⁸² Na yawu yandi zolaka kuzwa makonko mpe nyonso yankaka yina, beno zaba, mpe kubokila mwa bansusu. Mpe mwa bansusu yayi nionso ya fioti lendaka kwenda kuna, ke kokula kuna, mpe kudia. Kasi mwa ngononi yayi kaka lendaka ve kusala yawu. Ya vwandaka ve—vwandaka tala kaka yandi ve.

Na yawu kilumbu mosi mama ya yandi kwisaka zomba yandi.

⁸³ Mpe yandi lendaka kuwa nsusu yina ya kento ke kokula. Yandi lendaka meka na kusala nionso samu yandi kokula, kasi yandi lendaka ve kusala yawu. Yandi mekaka na kutala mutindu nsusu, kasi yandi lendaka ve kusala yawu. Beno me mona, yandi vwandaka ngononi. Yandi, na kubanda, yandi vwandaka ngononi. Yandi butukaka kaka na nsusu ya kento.

Ya kele mutindu bamambeke ya dibuundu mosi. Konso . . . Ya kele mutindu yina; pene ya mosi na ngaanda ya kuvwanda, ya kele kieleka.

⁸⁴ Kasi kilumbu mosi mama ya yandi lemukaka na zulu ya yandi, mpe yandi bokaka. Yandi zabaka yawu. Yina wakanaka mbote. Samu na yinki? Yandi vwandaka ngononi, na kubanda.

Ya kele mutindu ya kele na Nsangu ya mbote, to Ndinga, to Ngolo ya Yesu Klisto. Ntangu ba zabaka bakala mosi na ntwala samu na Luzingu ya Kukonda nsuka, yandi kuwaka muningu ya kieleka, kuboka ya Nzambi, kima mosi ve lenda kanga yandi na Yawu.

Dibuundu lendaka tuba, “Bilumbu ya bimangu me luta,” kla, kla, kla. “Nge telama awa mpe nge kudia *yayi*, mpe telama awa mpe nge kudia *yina*.”

⁸⁵ Bima ya lupangu ya bansusu ke sala yawu diaka ve samu na yandi. Yandi me kwenda! “Mambu nionso ke salama!” Yandi ke zanguka na ntoto.

Ya kele samu na yina, dyambu na Miklisto mingi bubu yayi, bawu lenda ve kubika makulu ya bawu na ntoto.

Mama ya kiboba tubaka, “Mwana, dumuka! Nge kele ngononi. Mata awa kisika mu kele.”

Yandi tubaka, “Mama, mu me dumukaka ata fioti ve, na luzingu ya munu.”

⁸⁶ Yandi tubaka, “Mbote, nge ke dumuka! Nge kele ngononi, na kubanda. Nge kele nsusu ve.” Na yawu yandi bakaka kudumuka ya yandi ya ntete mpe bulaka mapapu ya yandi; ya vwandaka ve mbote mingi, kasi yandi katulaka ntoto.

Ya kele mutindu beto ke salaka. Beto ke ndima Nzambi na lukwikilu, na nzila ya Ndinga yina me sonama. Ya kele na kima na kati kuna; ya kele Luzingu yango ya Kukonda nsuka. Ba zabaka beno na mantwala samu na yawu.

⁸⁷ Nkooko ya yandi ya bakala mpe nkooko ya kento vwandaka bangononi. Yandi vwandaka ngononi, ntangu nyonso. Ngononi ke vukanaka ve na bima yankaka. Yandi kele ve hybride ata fioti, yandi kele ngononi.

⁸⁸ Na yina, na manima beno me zaba ti Ndinga ya kieleka ya Nzambi vwandaka Madia ya Ngononi, na yina beno me bika kima yankaka. Na yina ba salaka beno na kifwani ya moyo ya Nzambi ya moyo. Beno kuwaka na théophanie ya beno. “Kana nzutu ya ntoto yayi kubeba, beto kele na mosi yina ke na kuvingila.”

Beno ke tuba, “Ya kele kieleka, Mpangi Branham?”

Mbote mingi, beto baka mwa bangononi mpe beto tala yawu baminuti fyoti. Ya vwandaka na nkumbu mosi, muntu mosi na nkumbu ya Moise. Muntu nionso zaba ti ba ke bokila profete ngononi, na kati ya Biblia.

⁸⁹ Ya vwandaka na profete mosi na nkumbu ya Moise. Mpe kilumbu mosi Nzambi bokilaka yandi, mpe zolaka ve kubika yandi kukwenda na yinsi, mpe yandi—yandi kufwaka na zulu ya Ditadi. Bawanzio nataka yandi mpe zikaka yandi.

Ya vwandaka na muntu yankaka, ngononi, yina zolaka kufwa ve. Yandi sabukaka kaka Jourdain, mpe Nzambi fidisaka pusu-pusu; mpe robe yayi ya nsuni yandi kubwaka, mpe vumbukaka mpe bakaka ntalu ya seko.

Bankama nana ya bamvula na ntwala, bankama nana ya bamvula na ntwala, na Mongo ya Nsobolo, awa telamaka bantu yayi zole. Nzutu ya Moise polaka bankama ya bamvula, kasi awa yandi vwandaka na mutindu mosi tii Pierre, Jacques, mpe Jean zabaka yandi. Amen! “Kana tabernacle ya ntoto yayi kubeba,” kana beno kele kinama ya Nzambi yina talisamaka awa na zulu ya ntoto, “nge ke na nzutu yina ke na kuvingila nge ntangu nge katuka na yinza yayi.” Kuna bawu vwandaka, ya kutelama na zulu ya Mongo ya Nsobolo, na théophanie ya bawu. Samu ti, bawu vwandaka baprofete na bayina Ndinga kwizaka.

⁹⁰ Mpe beto tala profete yankaka, kilumbu mosi, na nkumbu ya Samuel. Yandi vwandaka muntu ya nene. Yandi longaka Israel; yandi tubaka na bawu ti bawu zolaka ve kuvwanda na ntinu. Yandi tubaka, “Mu me tubaka ntete kima mosi na beno na Nkumbu ya Mfumu kasi yina me salamaka ve?”

Bawu tubaka, “Ve. Nyonso yina nge ke tubaka ntangu nyonso na Nkumbu ya Mfumu kusalama.”

Yandi vwandaka profete, mpe yandi kufwaka.

⁹¹ Pene ya bamvula tatu to yiya na ntwala, ntinu kotaka na mpasi; yina vwandaka ntete Menga ya Yesu Klisto kubasika. Yandi vwandaka na paladiso. Mpe ndoki ya kento ya En-dor bokilaka muntu na kwiza, mpe kubondila Saül. Mpe ntangu ndoki kumonaka yandi ya kutelama, yandi tubaka, “Mu ke mona nzambi kutelama na ntoto.”

⁹² Mpe na manima bakala yango kufwaka, ba zikaka yandi, mpe polaka na kati ya ntoni, awa yandi vwandaka ya kutelama kuna na kati ya caverne yina, na ba-robe ya profete na zulu ya yandi, mpe yandi vwandaka kaka profete. Amen. Samu ti yandi tubaka, “Samu na yinki nge me bokila munu na kubasika na kupema ya munu, na kumonaka ti nge me kuma mbeni ya Nzambi?” Beno tala yandi ke pesa profesi. “Mbasi na nkokila, na ntangu yayi, nge ke vwanda na munu.” Yandi vwandaka kaka profete, ata ti yandi me katukila nzutu yayi.

Beno me mona, yandi kumaka awa mpe vwandaka kitini ya Ndinga yina, mpe yandi kotaka na nsuni ya luzingu mpe vutukaka na kati ya nzutu yina ba kubikaka samu na yandi na ntwala ya mbandukulu ya yinza. Yandi kotaka na théophanie, yina vwandaka Ndinga. Beno me bakula yawu? Ya kele kisika bakwikidi nyonso ke kwendaka ntangu beto ke katuka awa.

⁹³ Na yina, na mutindu yina, vwale na manima kele ya kuzanguka. Beno me mona, beno kele Ndinga, mpe, ntangu beno ke kota kuna. Mutindu mwa bébé; mutindu mu tubaka ntama mingi ve. . .

⁹⁴ Ntangu yayi beno tala. Lukumu na Nzambi samu na kuzibula Bidimbu yayi, ya kele kisambu ya munu, na kuzaba bima yayi!

⁹⁵ Ntangu yayi luzayikisu ya kieleka ya Melchisédek ke monika. Yinki? Yandi vwandaka Nzambi, Ndinga, ntete Yandi kuma nsuni; Nzambi, Ndinga. Na yina, Yandi zolaka vwanda; muntu yankaka ve zolaka kuvwanda yina ke kufwaka ve mutindu Yandi. Beno me mona, mu vwandaka na tata mpe mama; beno, mpe. Yesu vwandaka na tata mpe mama. “Kasi Muntu yayi vwandaka na tata ve, to vwandaka na mama ve.” Yesu vwandaka na ntangu Yandi bandaka; Muntu yayi vwandaka na tata ve. Yesu pesaka luzingu ya Yandi; Muntu yayi zolaka ve, samu ti Yandi vwandaka Luzingu. Mpe ya kele Muntu mosi ntangu nyonso. Mu banza ti Nzambi ke monisa yawu na beno. Muntu mosi kaka, ntangu nyonso.

⁹⁶ Beno tala ksalu ya Yandi, “Ntinu ya ludedomo.” Ntangu yayi, Hébreux 7:2, “Ntinu ya ludedomo, mpe Ntinu ya ngemba.” Yandi kele bantinu zole. Ntangu yayi beno tala mbote, Hébreux 7:2, “Ntinu ya ludedomo, mpe Ntinu ya ngemba.” Yandi kele

bantinu zole kuna. Ntangu yayi tuka Yandi me kwiza na nsuni mpe me yamba nzutu ya Yandi, na Apocalypse 21:16, ba ke bokila Yandi, “Ntinu ya bantinu.” Yandi kele bawu nyonso tatu, kintwadi. Beno me mona, Ntinu Nzambi, Ntinu Théophanie, Ntinu Yesu. “Yandi kele Ntinu ya bantinu.”

Ya me salama nyonso, kaka mutindu moyo, nzutu, mpe mpeve, nyonso ke kwiza na kusala mosi.

⁹⁷ Mpe, Yandi kele Tata, yina vwandaka ya ntete; Mwana; mpe Mpeve-Santu, Mpeve.

“Ntinu ya ludedomo,” Mpeve ke kinama; théophanie, “Ntinu ya—ya ngemba,” théophanie; mpe na nsuni Yandi vwandaka “Ntinu ya bantinu,” Muntu mosi.

⁹⁸ Ntangu théophanie, Moise monaka Yandi, Exode 3:2, Yandi vwandaka théophanie. Moise zolaka kumona Nzambi. Yandi kuwaka ndinga ya Yandi, kuwaka Yandi kuzonza na yandi, monaka Yandi na mulaka kuna, mutindu Dikunzi ya nene ya Tiya. Mpe yandi tubaka, “Nani Nge kele? Mu zola kuzaba Nani Nge kele.” Moise tubaka. “Mu ke tula. . .” “Kana Nge ke bika munu kumona Nge, mu ke zola kumona kizizi ya Nge.”

⁹⁹ Yandi tubaka, “Muntu ve lenda mona kizizi ya Munu.” Yandi tubaka, “Mu ke tula diboko ya Munu na zulu ya meso ya nge, mpe Mu ke luta. Mpe nge lenda mona mukongo ya Munu, kasi ve kizizi ya Munu.” Beno me mona? Mpe ntangu Yandi salaka yawu, ya vwandaka manima ya Muntu; ya vwandaka théophanie. Na yina Ndinga yina kwisaka na Moise, “MU KELE,” yina vwandaka Ndinga. Ndinga kwizaka na Moise na nzutu ya Dikunzi ya Tiya na divunda ya tiya, “MU KELE.”

¹⁰⁰ Mutindu Ndinga ya théologie, ya théophanie, na kisika, beno lemvočila munu, Yandi kwizaka na Abraham mutindu Muntu, na yisi ya yinti ya chène. Ntangu yayi beno tala kuna. Kuna kwizaka Muntu na Abraham, tatu ya bawu, mpe vwandaka na yisi ya yinti ya chène, tatu ya bawu. Mpe beno tala, na manima Yandi zonzaka na Abraham. . .

¹⁰¹ Samu na yinki Yandi kwizaka? Abraham, vwandaka yandi yina vwandaka na nsilulu mpe nsangu ya mwana yina vwandaka kwiza, mpe dyaka yandi vwandaka Ndinga ya Nzambi-profete yina vwandaka tula kivuvu na Ndinga ya Nzambi, na kubokilaka kima ya kuswaswana mutindu ti ya vwandaka ve. Beno me mona mutindu Ndinga kele ya kulunga? Ndinga kwizaka na profete. Beno me mona, ya vwandaka na Nzambi na théophanie. Mpe Biblia ke tuba, “Ndinga ke kwizaka na profete.” Mpe awa vwandaka Ndinga na théophanie.

Ntangu yayi beno ke tuba, “Ya vwandaka Nzambi yina?”

¹⁰² Abraham tubaka ti ya vwandaka. Yandi tubaka ti nkumbu ya Yandi vwandaka. . .yandi bokilaka Yandi Elohim. Ntangu yayi, na Genèse 1, beno ke mona, “Na mbandukulu *Elohim* vangaka

mazulu mpe ntoto.” Na Genèse 18, beto ke tala ti—ti Abraham bokilaka Muntu yayi yina vwandaka kuna mpe zonzaka na yandi, mpe lendaka tuba na yandi mansweki ya ntima ya yandi, kutuba na yandi yina Sarah vwandaka banza na manima ya Yandi, Abraham tubaka, “Ya kele Elohim.” Yandi vwandaka na mutindu ya théophanie. Beno me bakula yawu? Beno tala na manima . . .

¹⁰³ Ntangu yayi beto talaka ti Yandi vwandaka kuna na nzutu ya théophanie. Yandi bokilaka Yandi, “Mfumu Nzambi, Elohim.” Ntangu yayi, na Genèse 18, beto ke tala ti ya kele kieleka.

¹⁰⁴ Ntangu yayi beno tala, Abraham . . . Ya vwandaka na tatu ya bawu kintwadi, kasi ntangu Abraham kukutanaka na tatu, yandi tubaka, “Mfumu ya Munu.”

Kasi ntangu Lot, kuna na Sodome; zole na kati ya bawu kulumukaka kuna, mpe Lot monaka zole ya bawu kukwiza, mpe yandi tubaka, “Bamfumu ya munu.” Beno me mona, yinki vwandaka dyambu? Kisika ya ntete, Lot vwandaka ve profete, ya kele kieleka, to ve dyaka ti yandi vwandaka munati-nsangu ya ngunga, na yawu yandi vwandaka ve na luzayikisu ya Yandi. Ya kele kaka kieleka. Lot zolaka bokila bawu “bamfumu.” Kumi na zole ya bawu, yandi zolaka tuba dyaka, “bamfumu.”

Kasi ata lutangu yikwa Abraham kumonaka, Ya vwandaka dyaka Mfumu mosi. Ya kele Nzambi. Yayi vwandaka Melchisédek.

¹⁰⁵ Beno tala, na manima bitumba manisaka, Melchisédek sadilaka mwana ya Yandi ya lunungu kominyo; beno banza na yawu, kitini ya Yandi mosi! Ntangu yayi beto zola kumona awa. Na kifwanukusu awa kele, na kutala, kominyo. Na manima ya mvita, Yandi pesaka Yandi mosi, samu ti kominyo kele kitini ya Klisto. Mpe na manima mpasi me kumana, na manima ba me ningisa beno, na yina ya kele ntangu beno ke kota na Klisto, beno kuma kitini ya Moyo yayi. Beno me bakula yawu?

¹⁰⁶ Jacob nwanaka mpimpa ya muvimba, mpe zolaka ve kubika Yandi tii kuna Yandi sakumunaka yandi. Ya kieleka. Beno ke nwana samu na Luzingu! Mpe na manima bitumba me suka, na yina Nzambi ke pesa beno Yandi mosi. Yina kele kominyo ya Yandi ya kieleka. Mwa dimpa mpe hostie ke monikisa Yawu kaka. Beno zolaka baka yawu ve kana beno me nwana na yawu ve mpe beno kuma kitini ya Nzambi.

¹⁰⁷ Beno bambuka moyo, na ntangu yayi, ba tumaka mbundana ata fioti ve, ve tii na ntwala ya lufwa ya Yesu Klisto, bankama mpe bankama mpe bankama ya bamvula na ntwala.

¹⁰⁸ Kasi Melchisédek, na manima ya mwana ya Yandi Abraham kuzwaka lunungu, Melchisédek kutanaka na yandi mpe pesaka yandi vinu mpe dimpa; na kulakisaka ti na manima bitumba yayi ya ntoto me manisa, beto ke kutana na Yandi na mazulu mpe ke baka kominyo dyaka. Ya ke vwanda Madia ya Makwela. “Mu ke

kunwa dyaka ve vinu, to kudya mbuma, tii mu ke kudya yawu mpe kunwa yawu na beno, ya malu-malu, na Kimfumu ya Tata ya Munu.” Ya kele kieleka?

¹⁰⁹ Beno tala dyaka, Melchisédek kwendaka kukutana na Abraham ntete yandi vutuka na yinzo. Wapi mutindu ya kifwanukusu ya kitoko awa kele na beto! Melchisédek kutanaka na Abraham ntete yandi kuma na yinzo, na manima ya mvita.

Beto ke kutana na Yesu na mipepe, ntete beto ke kuma na Yinzo. Ya kele kieleka. Ba-Théssalonicien ya Zole ke tuba na beto ti, samu, “beto ke kutana na Yandi na mipepe.” Kifwanukusu ya kitoko ya lukutakanu ya Rébecca na Isaac, na bilanga, na madidi ya kilumbu. “Beto ke kutana na Yandi na mipepe.” Ba-Théssalonicien ya Zole ke tuba na beto mutindu yina. “Samu ti beto yina kele ya moyo mpe ke bikala ke kanga ve nzila to ke kanga ve bayina kele ya kulala; samu mpungi ya Nzambi ke wakana; bantu ya kufwa na Klisto ke vumbuka ntete; Beto yina ke vwanda ya moyo mpe ke bikala beto ke vukana kintwadi na bawu, samu na kukutana na Mfumu na mipepe.” Kulunga, bifwanukusu nyonso yayi.

¹¹⁰ Na yawu, théophanie, kana beno kufwaka mpe kotaka na théophanie yango, (yinki ke salama?) théophanie ke kwizaka na ntoto samu na kubaka nzutu ya kuvulusa. Mpe kana beno kele awa na zulu, beno baka nzutu samu na kukutana na théophanie, beno bawu yayi, “mpe beno zanguka, mpe beno kwenda kutana na Mfumu na mipepe.”

¹¹¹ Nani kele Melchisédek yayi kasi Nzambi!

¹¹² Ntangu yayi beto ke mona awa pwelele kinsweki ya beto ya baluzingu na nzyetolo, mpe lufwa, mpe kisika beto ke kwenda na manima beto ke kufwa. Mpe, nsodolo ya mantwala kele na pwelele awa. Ntangu yayi beno kuwa na yina beto ke longaka yayi, na bukebi nionso.

¹¹³ Bitezo ya—ya lukanu ya Seko Yandi vwandaka na kinsweki ya Yandi ntangu yayi me monisama pwelele. Beno tala, ya kele dyaka na bitezo tatu na kulunga. Kaka mutindu Yandi ke vulusa yinza, mutindu mosi Yandi ke vulusa Dibuundu ya Yandi, Yandi ke vulusa bantu, na bitezo tatu. Ntangu yayi beno tala. Ya ntete kele kunungisama, mutindu Luther longaka; ya zole, kusantisama, mutindu Wesley longaka; ya tatu, mbotika ya Mpeve-Santu. Ya kele kieleka. Na manima ke kwiza Enlevement!

¹¹⁴ Ntangu yayi, yinza, wapi mutindu Yandi vulusaka yinza? Ya ntete, yina Yandi salaka, ntangu yawu sumukaka, Yandi sukulaka yawu na mbotika ya maza. Ya kele kieleka. Na yina Yandi losaka Menga ya Yandi na zulu ya yawu, kubanda na kulunsi, mpe santisaka yawu mpe bokilaka yawu Yandi Mosi. Mpe na manima yinki Yandi ke sala? Mutindu Yandi pasulaka yinza nyonso na beno, mpe vutulaka kima nyonso na nzila

ya mbotika ya tiya ya Mpeve-Santu, Yandi ke vutula diaka yinza. Mpe ba ke yoka yawu na Tiya, mpe ba ke sukula konso nkuna, samu na mafuku ya ba-kilometre na zulu, bima nionso ke sukwama. Mpe kuna ya kele na Mazulu ya Malu-malu mpe Ntoto ya Malu-malu, kaka mutindu beno kele kivangu ya malu-malu na Klisto Yesu ntangu Mpeve-Santu ke simba beno. Beno me mona, beno bawu yayi, nionso kele kaka pwelele mutindu ya lendaka vwanda. Bima nionso kele na tatu.

115 Mbutukulu ya kimuntu kele na tatu. Yinki kima ya ntete ke salama na kento yina kele na bébé? Yinki ke zenga ntete? Maza. Yinki ke zenga yina ke landa? Menga. Yinki kele kulanda? Luzingu. Maza, menga, mpeve.

Yinki ke salama na yinti? Ya ke pola. Yinki kele kima ya ntete? Yinti. Yinki ke landa? Felele ya disangu. Yinki ke landa? Mpusu. Kuna mbuma, beno me mona, ke basika na yawu. Kaka bitezo tatu ya yawu, tii ya ke kuma na mbuma. Ya kieleka.

116 Nzambi ke siamisaka yawu. Ya kele ntangu nyonso kieleka. Nzambi ke siamisaka ti ya kele kieleka. Beno lakisa pwelele, yina ba soolaka na ntwala kele kaka yandi yina ba ke talaka na mpulusu. Beno me bakula yawu? Beno bika mu tuba yawu diaka. Yina ba soolaka na ntwala kele yina ba ke talaka na mpulusu. Bantu ke na kusala mutindu, beno banza ti bawu kele, kasi mpulusu ya kieleka kele bayina ba soolaka ntete. Samu, mpova yayi *kuvulusa* zola kutuba “kuvutula.” Ya kele kieleka? *Kuvulusa* kele kima mosi. . . *Kuvulusa* kima mosi, kele, “kuvutula yawu na kisika ya yawu ya ntete.” Alleluia! Na yina ya kele kaka bayina ba soolaka ntete ke vutuka, samu ti bayankaka katukaka ve Kuna. Beno me mona, “beno vutuka!”

117 Na kuvwandaka ya Seko na Yandi, na mbandukulu. . . Luzingu ya Kukonda nsuka yina vwandaka na beno, dibanza ya Yandi na yina beno vwandaka, kaka, Yandi zolaka ti beno. . . Yandi zolaka ti mu telama na chaire, kutuba. Yandi zolaka ti beno kuvwanda na kiti na nkokila yayi. Na yina beto ke na kusadila lukanu ya Yandi ya Seko. Mpe yandi yina bikaka yinzo, kwizaka kaka na ntoto samu na kusadila lukanu ya Yandi. Ya kele kieleka? Mbote mingi. Na yina, na manima ya manisaka, ya me vutuka na kitezo ya nkembo; ya me kula mpe me vutuka dyaka.

118 Kuyituka ve ti Paul lendaka tuba, ntangu ba vwandaka tunga ditadi samu na kuzenga yintu ya yandi; yandi tubaka, “O lufwa, wapi ntunga ya nge? O ntoni, wapi lunungu ya nge? Kasi matondó na Nzambi Yina pesaka beto lunungu!” Yandi tubaka, “Lufwa, tuba na munu kisika nge lenda sala ti mu boka! Ndyamu, tuba na munu wapi mutindu nge ke kanga munu! Samu ti, mu kele mfumu ya Luzingu ya Seko.” Amen! Yandi zabaka yawu. Lufwa, difelo, ntoni, kima mosi ve lendaka kanga yandi. Mpe kima mosi ve lendaka talisa beto mpasi, kele na

Luzingu ya Kukonda nsuka! Yandi bakulaka ti yandi vwandaka ya kusakumuna na Luzingu ya Kukonda nsuka.

¹¹⁹ Kaka mutindu mwa kinoko. Kana mu me bakula, ya kele. . . Mu zaba mingi ve na yina me tala chimie. Kasi, ya fwana vwnda ti ya kele kuvukana ya madidi to ya atimosifere. Mpe ntangu mpimpa ke kuma madidi mpe mpimpa, ya ke kubwa na mazulu mpe ke kubwa na zulu ya ntoto. Ya me katuka kisika mosi kuna. Kasi na suka yina landaka ntete mwini kubasika, ya kele ya kulala kuna, mwa kima yayi, ke na kutekita. Kasi beno bika kaka mwini kubasika, beno tala yawu kubanda na kusema. Ya kele kyese. Samu na yinki? Mwini ke bokila kaka yawu na kuvutuka kisika ya katukaka.

Mpe ya kele mutindu na Muklisto. Alleluia! Beto zaba ntangu beto ke kota na Mvwandulu ya Nzambi, kima mosi na kati ya beto ke tuba na beto ti beto me katuka kisika mosi kuna, mpe beto ke vutuka diaka na Ngolo yina ke benda beto.

¹²⁰ Mwa kinoko ke pesa nsemo, ke ngenza mpe ke boka, samu ti yandi zaba ti yandi me katuka kuna, mpe mwini yina ke matisa yawu diaka.

Mpe muntu yina kele kinama ya Nzambi, yina me butuka na Nzambi, zaba, alleluia, ntangu yandi kotaka na ngwisani na Mwana ya Nzambi, ba ke benda yandi awa kilumbu mosi. “Samu ti kana ba zangulaka munu na ntoto, Mu ke benda bantu nyonso na Munu.” Amen!

¹²¹ Ntangu yayi, beno tala, ntangu yayi beto ke mona Melchisédek mpe samu na yinki ti Marie vwndaka ve mama ya Yandi. Ya kele samu na yina Yandi bokilaka yandi “kento,” *mama* ve. “Yandi vwndaka ve na tata,” samu ti Yandi vwndaka Tata, Tata ya seko, tatu na Yandi. “Yandi vwndaka na mama ve,” ya kieleka ve. Yandi vwndaka na tata ve, samu Yandi vwndaka Tata. Mutindu powete tubaka kilumbu mosi, na kuzonzaka mingi ya nene na Yesu, yandi tubaka:

MU KELE yina zonzaka na Moïse na mulaka ya Tiya,

MU KELE Nzambi ya Abraham, Mbwetete yina ke Ngenzaka ya Suka.

MU KELE Alpha, Omega, mbandukulu na nsuka.

MU KELE ngidikulu ya muvimba, mpe Yesu kele Nkumbu. (Ya kele kieleka.)

Oh, nani beno ke tuba ti mu kele, mpe wapi kisika bawu ke tuba ti mu me katuka,

Beno zaba Tata ya Munu, to beno lenda tuba Nkumbu ya Yandi? (Alleluia!)

¹²² Ya kele Nkumbu ya Tata! Yinga, “Mu me kwiza na Nkumbu ya Tata ya Munu, mpe nge me yamba Munu ve.” Beno me

mona? Kieleka, Yandi kele mutindu mosi mazono, bubu yayi, mpe kukonda nsuka.

¹²³ Mpe Melchisédek yayi kumaka nsuni. Yandi monikisaka Yandi mosi mutindu Mwana ya muntu ntangu Yandi kwizaka, mutindu Profete. Yandi kwizaka na bankumbu tatu ya Mwana: Mwana ya muntu, Mwana ya Nzambi, Mwana ya David.

¹²⁴ Ntangu Yandi vwandaka awa na zulu ya ntoto, Yandi vwandaka Muntu, samu na kulungisa Masonuku. Moise tubaka, “Mfumu Nzambi ya beno ke basisila beno Profete mosi mutindu munu.” Na yawu Yandi zolaka kwisa mutindu Profete. Yandi tubaka ve, ata fioti ve, “Mu kele Mwana ya Nzambi.” Yandi tubaka, “Mu kele Mwana ya muntu. Nge ke kwikila Mwana ya muntu?” Samu ti, ya kele yina Yandi zolaka pesa kimbangi, samu ti ya kele yina Yandi vwandaka.

Ntangu yayi Yandi me kwiza na Nkumbu ya mwana yankaka: Mwana ya Nzambi, yina ke monanaka ve, Mpeve.

Mpe ntangu Yandi ke kwiza dyaka, Yandi kele Mwana ya David, samu na kuvwanda na zulu ya kiti ya Yandi ya kimfumu.

¹²⁵ Ntangu yayi ntangu Yandi vwandaka awa mpe kumaka muntu, ba bokilaka Yandi, “Mwana ya muntu.” Ntangu yayi, wapi mutindu Yandi kukitalisaka Yandi mosi na yinza mutindu Mwana ya muntu, Profete?

¹²⁶ Kilumbu mosi mu vwandaka tuba disolo ya Pierre mpe André, mpangi ya yandi ya bakala. Bawu vwandaka milobim-bisi, mpe tata ya bawu Jonas vwandaka mukwikidi ya nene. Kilumbu mosi bawu tubaka ti yandi vwandaka na lweka ya bwatu. Yandi tubaka, “Bana ya babakala, nge zaba mutindu beto vwandaka sambila ntangu beto vwandaka na nsatu ya bambisi.” Ba vwandaka milobi-mbisi. Yandi tubaka, “Beto me tula kivuvu na Nzambi, Yehowa, samu na kuzinga ya beto. Mpe mu ke na kununa ntangu yayi; mu lenda diaka ve kuvwanda na beno bana ya babakala. Mpe mu ke vwandaka ntangu nionso, mutindu bakwikidi nionso ya kieleka, vwandaka vingila ntangu yina Mesiya ke kwisa. Beto me kuzwa mitindu nyonso ya bantu ya luvunu, kasi ya ke na kwiza Mosi ya kieleka, kilumbu mosi.” Mpe yandi tubaka, “Ntangu Mesiya yayi ke kwiza, mu zola ve ti beno bana ya babakala ba vuna beno. Mesiya yayi ke vwanda kaka théologien ve. Yandi ke vwanda Profete, samu na profete ya beto Moise, yina beto ke landa, yandi tubaka.”

Ntangu yayi, Juif nyonso ke kwikila profete ya yandi. Ba me longa yandi na kuzaba yawu. Mpe kana profete me tuba kima yina kele kieleka, na yina ya kele kieleka. Kasi Nzambi tubaka, “Kana ya kele na mosi na kati ya beno, ya kimpeve, to profete, Munu Mfumu ke kukitalisa Munu mosi na yandi. Mpe yina yandi ke tuba ke salama, na yina beno kuwa yandi mpe beno vwanda na boma ya yandi; kasi kana ya salama ve, na yina beno vwanda

na boma ya yandi ata fioti ve.” Beno me mona? Na yawu yina vwandaka nsiamisa ya profete.

¹²⁷ “Na yawu Moise vwandaka profete yina me siamisama, mpe yandi tubaka, ‘Mfumu Nzambi ya beno ke basisila beno, na kati ya beno, na kati ya bampangi ya beno, Profete mosi mutindu munu. Mpe nyonso yina ke kuwa Yandi ve ba ke katula yandi na bantu.’” Yandi tubaka, “Ntangu yayi, bana, beno bambuka moyo, ti, mutindu Hébreux, beto ke kwikila ti baprofete ya Nzambi me siamisama.”

Ntangu yayi beno kuwa mbote. Beno kondwa yawu ve. Mpe yandi tubaka, “Ntangu Mesiya ke kwisa, beno ke zaba Yandi, samu Yandi ke vwanda Profete-Mesiya. Ntangu yayi, ba tubaka ti ya me kuma bamvula nkama yiya. Beto me kuzwa ve profete kubanda Malachie, kasi Yandi ke vwanda.”

¹²⁸ Kilumbu mosi, na manima ya lufwa ya yandi, na mwa bamvula fioti, mwana ya yandi André vwandaka tala na kumu. Mpe yandi kuwaka muntu ya mfinda na ntoto ya kuyuma, na kutubaka, “Mesiya yina kele ya kutelama na kati-kati ya beno ntangu yayi!” Ngononi ya nene yina telamaka kuna na ntoto ya kuyuma mpe pumbukaka na zulu kuna, yandi tubaka, “Mesiya kele na kati-kati ya beno na ntangu yayi. Beto zaba Yandi ntete ve, kasi Yandi kele ya kutelama na kati-kati ya beno. Mu ke zaba Yandi, samu ti mu ke mona kidimbu yina me katuka na Mazulu.”

Kilumbu mosi yandi tubaka, “Kuna, tala, kele Mwana-dimeme ya Nzambi yina ke katulaka disumu ya yinza!”

Yandi kwendaka . . . kwendaka bakala yayi, samu na kutala mpangi ya yandi ya bakala. Yandi tubaka, “Simon, mu zola ti nge kwisa awa; beto me mona Mesiya.”

“Oh, landila, André! Nge zaba ya kulutila na yina!”

“Oh, mu zaba. Kasi, ti, Muntu yayi kele mutindu yankaka.”

“Wapi kisika Yandi kele? Wapi kisika Yandi katukaka?”

“Yesu ya Nazareth.”

“Mwa mbanza yina ya fioti, ya nkú? Samu na yinki, Yandi lendaka ve kukwisa na kisika ya yimbi, ya mvindu mutindu yina.”

“Beno kwiza kaka mpe mona.”

¹²⁹ Na nsuka yandi ndimaka ti yandi kulumukaka kilumbu mosi. Na yawu ntangu yandi kotaka na ntwala ya Mesiya yayi, Yesu vwandaka ya kutelama kuna, vwandaka zonza na bantu. Ntangu yandi belamaka na ntwala ya Yandi, Yandi tubaka, “Nkumbu ya nge kele Simon, mpe nge kele mwana ya Jonas.” Ya salaka yawu. Yandi vwandaka na bafungula ya Kimfumu. Samu na yinki? Yandi zabaka ti Muntu yina zabaka yandi ve. Mpe wapi mutindu Yandi zabaka yandi, mpe tata yina ya santu yina longaka yandi wapi mutindu kukwikila Mesiya?

¹³⁰ Ya vwandaka na bakala mosi ya kutelama kuna, na nkumbu ya Philippe. Oh, yandi vwandaka kieleka na ntima ya kuzatuka! Yandi zabaka muntu yankaka, yandi vwandaka longuka Biblia. Yandi kwendaka, pene-pene ya mongo, mpe yandi monaka yandi kuna na kati ya kilanga ya yandi ya olive. Yandi vwandaka fukama, vwandaka sambila. Bawu vwandaka na baleso mingi ya Biblia kintwadi. Na yawu yandi basikaka kuna mpe yandi tubaka, na manima yandi manisaka na kusambila, yandi tubaka, “Beno kwiza, mona Nani beto talaka; Yesu ya Nazareth, mwana ya Joseph. Yandi kele Mesiya beto ke na kuvingila.”

Ntangu yayi mu lenda kuwa Nathanael kutuba, “Ntangu yayi, Philippe, nge me kwenda ve na mudindu mingi, mutindu yina ve?”

¹³¹ “Oh, ve. Ve. Ntangu yayi bika mu tuba na nge. Beno zaba, beto vwandaka longuka Biblia kintwadi, mpe yinki profete tubaka ti Mesiya ke vwanda?”

“Yandi ke vwanda Profete.”

“Nge ke bambuka moyo ti kiboba ya mulobi-mbisi yina nge sumbaka mbisi, yina longukaka mingi ve samu na kusonika nkumbu ya yandi, yina ba me bokila Simon?”

“Yinga. Uh-huh.”

¹³² “Yandi me kwiza. Mpe nge zaba yinki? Yesu yayi ya Nazareth tubaka na yandi ti nkumbu ya yandi vwandaka Simon, sobaka nkumbu ya yandi na Pierre, yina kele ‘ditadi ya fioti’ mpe tubaka na yandi nani vwandaka tata ya yandi.”

“Mbote,” yandi tubaka—yandi tubaka, “Mu zaba ve. Kima ya mbote lendaka basika na Nazareth?”

¹³³ Yandi tubaka, “Beto zonzila yawu ve; beno kwiza kaka mpe beno mona.” Ya kele dibanza ya mbote, “Beno kwiza mpe beno mona.”

Na yawu awa me kwiza Philippe, yandi nataka Nathanaël. Mpe ntangu yandi belamaka, na kutala Yesu ya kutelama, vwandaka zonga, na kutala vwandaka sambila samu na bambevo na ndonga ya bisambu. Mpe ntangu yandi kumaka kisika Yesu vwandaka, Yesu talaka yandi, mpe tubaka, “Beno tala Israelite yina na kati ya yandi luvunu kele ve.”

¹³⁴ Ntangu yayi, beno ke tuba, “Mbote, ya vwandaka mutindu yina yandi lwataka.” Oh, ve. Bamfumu nyonso ya esete ke lwataka mutindu mosi. Yandi zolaka vwanda muntu ya Syrie, to vwandaka kima yankaka; mandefo, lele.

¹³⁵ Yandi tubaka, “Beno tala Israelite yina na kati ya yandi luvunu kele ve,” na mutindu yankaka, “muntu ya kieleka, ya kusungama.”

Mbote, mutindu ya mvindu ya Nathanael. Mpe yandi tubaka, “Rabbi,” yina zola kutuba, “mulongi.” “Rabbi, wapi ntangu Nge

me zaba munu? Wapi mutindu Nge me zaba ti mu vwandaka Juif? Wapi mutindu Nge me zaba ti mu vwandaka ya kusungama, luvunu ve?"

¹³⁶ Yandi tubaka, "Ntete Philippe kubokila nge, ntangu nge vwandaka na yisi ya yinti, mu monaka nge." Uh! Ba-kilometre kumi na tanu ntama kuna, na lweka yina yankaka ya yinsi, kilumbu yina na ntuala.

Yinki yandi tubaka? "Rabbi, Nge kele Mwana ya Nzambi. Nge kele Ntinu ya Israel!"

¹³⁷ Kasi kuna telamaka banganga-Nzambi yina kuna, na nkadulu ya yandi mosi, ya kuzabana, tubaka, "Muntu yayi kele Béelzébul, nganga-nkisi."

Yesu tubaka, "Mu ke lemvokila beno samu na yawu."

¹³⁸ Ntangu yayi, beno bambuka moyo, ata mbala mosi ve ti bawu tubaka yawu na ngolo, kasi bawu tubaka yawu na bantima ya bawu. "Mpe Yandi zabaka mabanza ya bawu." Ya kele kieleka. Ya kele yina Biblia ke tuba. Beno bokila yawu *télépathie* kana beno zola, kasi Yandi—Yandi zabaka mabanza ya bawu.

¹³⁹ Mpe Yandi tubaka, "Mu ke lemvokila nge samu na yawu. Kasi kilumbu mosi Mpeve-Santu ke kwiza mpe ke sala kima mosi yayi," na manima ya kukwenda ya Yandi; "kutuba mpova mosi samu na kutelemina Yawu, ke kuzwa mulemvo ata fioti ve na yinza yayi to na yinza yina ke kwisa." Ya kele kieleka? Ntangu yayi, yina vwandaka ba-Juif.

Na yina kilumbu mosi Yandi vwandaka na nsatu ya kukwenda na Samarie.

¹⁴⁰ Kasi kaka ntete beto sala yawu, beto talaka kento yango, to, bakala—bakala yayi, na yina Yandi lutaka na mwelo ba bokilaka Kitoko, ti yandi belukaka. Mpe Yesu zabaka mpasi ya yandi, mpe tubaka na yandi, "Baka mbeto ya nge mpe kwenda na yinzo." Mpe yandi salaka yawu, mpe beluka.

Na yina beto ke mona ti, ba-Juif, bayankaka kati ya bawu yambaka Yandi. Bayankaka kwikilaka yawu; bayankaka ve. Samu na yinki bawu kwikilaka yawu ve? Bawu vwandaka ve ya kutumama na Luzingu. Bawu vwandaka ve kitini ya kinama yina.

¹⁴¹ Ntangu yayi beno bambuka moyo, bawu vwandaka banganga-Nzambi mpe bantu ya nene. Mpe Yesu . . . Beno banza na ba-théologien yina mpe banganga-Nzambi, bantu yina beno lendaka ve kumona kifu na luzingu ya bawu. Yesu tubaka, "Beno kele ya tata ya beno dyabulu, mpe bisalu ya yandi beno ke salaka." Yandi tubaka, "Kana beno kele ya Nzambi, beno ke kwikila Munu. Kana beno lenda kwikila Munu ve, beno kwikila bisalu yina Mu ke sala; ya ke pesa kimbangi ya Nani Mu kele."

¹⁴² Ntangu yayi, Biblia ke tuba, ti, “Yesu kele mutindu mosi mazono, bubu yayi, mpe kukonda nsuka.” Yesu tubaka, “Bisalu yina Mu ke sala yandi yina ke kwikila na Munu mpe ke sala yawu.” Ya kieleka? Beno tala, ya vwandaka Melchisédek ya kieleka ntangu yayi.

¹⁴³ Ntangu yayi beno tala, dyaka, ya vwandaka kaka na mikengi tatu ya bantu.

Beno me kuwaka munu kutuba ti mu vwandaka muntu ya nkabwani. Mu kele. Baklisto nyonso kele bantu ya nkabwani; ya kele ve kukabwana na ntinta, kasi kukabwana na mpeve. Ntinta ya mpusu ya yandi kele na kima ve ya kusala na yandi. Yandi kele mwana ya Nzambi na nzila ya Mbutukulu. Kasi Muklisto, Nzambi tubaka, “Kabula Munu...” “Basika na kati-kati ya bawu...” mpe nyonso yina. Yandi kele muntu ya nkabwani, na mvindu, na kati-kati ya mbote mpe yimbi.

¹⁴⁴ Kasi beno tala, bawu vwandaka na nkabwani na ntangu yina, kukabwana kati-kati ya ntinta ya nzutu yina vwandaka bantu ya Samarie.

Mpe ya kele kaka na makanda tatu ya bantu na zulu ya ntoto; kana beto ke kwikila Biblia; ya kele, Cham, Sem, mpe bantu ya Japhet. Ya kele bana tatu ya Noé. Beto nyonso basikaka kuna. Ya kele kieleka. Yina ke sala beto nyonso kuvutuka na Adam, yina ke salaka beto nionso bampangi. Biblia ke tuba, “Na menga mosi Nzambi vangaka bayinsi nyonso.” Beto nyonso kele bampangi, na nzila ya musisa ya menga. Bakala ya ndombe lendaka pesa menga na bakala ya mpembe, to yayi mpe yina. Bakala ya mundele lenda pesa menga na Japonais, muntu ya jaune, to Indien, muntu ya mbwaki, to nyonso yankaka yina, to muntu ya Japhet, to nionso yina, yandi lendaka pesa yandi menga, samu beto nionso kele menga mosi. Ntinta ya mpusu ya beto, kisika beto vwandaka zinga, beto vwandaka ve na kima ya kusala na yawu.

Kasi ntangu beto kele ya kukabwana, ntangu beto ke basika na yinza, mutindu Yandi basisaka Israel na Egypte. Ya kele ntangu beto kele ya kukabwana na bima ya yinza.

¹⁴⁵ Ntangu yayi, ba vwandaka Cham, Sem, mpe bantu ya Japhet. Mpe kana beto vwandaka na ntangu samu na kuvutula makanda manima, beno zolaka mona ba-Anglo-Saxon, kisika yandi katukaka. Ntangu yayi, ya vwandaka Juif. . . Samaritain, yina vwandaka kati-kati ya ba-Juif mpe Bantu ya makanda, yina kwelanaka na Bantu ya makanda na Balaam ke na kusala, mpe Moab. Bawu vwandaka ba-Samaritain. Mpe ya vwandaka na ba-Juif mpe Bantu ya makanda.

Ntangu yayi, beto ba-Anglo-Saxon vwandaka ve na kima ya kusala na yawu. Beto vwandaka kwikila ve na Mesiya mosi, to kima yankaka ve. Beto vwandaka vingila ve mosi. Ba kotisaka beto na manima.

Yesu kwizaka na baya Yandi Mosi, mpe bantu ya Yandi Mosi yambaka Yandi ve. Mpe Yandi tubaka na bilandi ya Yandi, “Beno kwenda ve na nzila ya Bantu ya makanda, kasi beno kwenda na kisika na mameme yina me zimbana ya Israel.” Mpe Yandi kwendaka kaka na dimeme yina zimbanaka ya Israel. Mpe beno tala mbote, Yandi monisamaka Yandi mosi mutindu Mwana ya muntu, ntete ba-Juif. Bawu mangaka Yawu.

Ntangu yayi, Samaritain, vwandaka kati-kati ya ba-Juif mpe Bantu ya makanda, bawu kwikilaka mpe, mpe vwandaka vingila Mesiya.

Beto vwandaka ve. Beto vwandaka mimpani, na ba-nkawa na mukongo ya beto, beto vwanza sambila biteki; Bantu ya makanda.

¹⁴⁶ Kasi ntangu yayi kilumbu mosi, Santu Jean 4, Yandi vwandaka na nsatu ya kuluta na Samarie, na nzila ya Yandi kuna na Jéricho. Kasi ba mataka kuna na Samarie. Mpe na yina Yandi vwandaka kwenda kuna, Yandi vwandaka na dibulu ya maza na ngaanda ya mbanza yina ba vwandaka bokila Sychar. Mpe dibulu ya masa, kana beno me vwandaka ntete kuna, ya ke salaka mwa kisika mosi ya lepele kaka mutindu yayi kele awa. Mpe ya kele na yintu ya bantu nyonso kuna, ya maza, kisika bawu nyonso ke kwizaka. Mpe bakento ke kwisaka na suka mosi, samu na kubaka banzungu ya bawu ya masa, mpe kutula yawu na zulu ya yintu ya bawu, mpe mosi na konso luketo, mpe ke tambula na yawu kaka ya kusungama mutindu ba lendaka, ba ke tiamuna ata kinoko mosi ve; ba ke solula mosi na yankaka. Na yawu, bawu zolaka, bantu zolaka basika kuna.

¹⁴⁷ Na yina yayi vwandaka pene ya ngunga kumi na mosi na kilumbu. Na yina Yandi fidisaka bilandi ya Yandi na mbanza, samu na kusumba bima ya kudia, madia. Mpe na yina bawu kwendaka . . .

¹⁴⁸ Ya vwandaka na kento mosi yina vwandaka ya luzingu ya yimbi, mutindu, beto ke bokila yandi, bubu yayi, kento ya bala-bala, to kento ya kindumba. Yandi vwandaka na babakala mingi. Na yina ntangu Yesu vwandaka ya kuvwanda kuna, kento yayi kwisaka kuna pene ya ngunga kumi na mosi. Beno me mona, yandi zolaka kwiza ve na bamwense ntangu bawu vwandaka kwiza na suka samu na kusosa maza ya bawu ya kusukula; yandi zolaka vingila tii bawu nyonso. . . Bawu vwandaka vukana ve mutindu bawu ke salaka ntangu yayi. Yandi vwandaka na kidimbu. Na yawu kuna, yandi basikaka samu na kubaka mwa maza, na yina yandi bakaka kaka muniololo ya ntama, mpe yandi kangaka yawu na dibungu, mpe bandaka na kukulumusa yawu.

Yandi kuwaka Muntu kutuba, “Kento, natina Munu masa ya kunwa.” Ntangu yayi, beno bambuka moyo, yayi kele Melchisédek. Yayi kele Yesu, mazono, Mwana ya muntu.

149 Mpe kento talaka na nziunga, mpe yandi monaka Juif mosi. Na yawu yandi tubaka, “Tata, ya kele mbote ve samu na Juif na kulomba kima mosi na Samaritain. Mu kele kento ya Samarie, na yawu Nge me zonza na ngaanda ya kisika ya Nge. Nge zolaka yufula munu kima ya mutindu yina ve. Beto ke na ngwisani ve na mosi na yankaka.”

150 Yandi tubaka, “Kasi kana nge zabaka Nani vwandaka tuba na nge, nge zolaka lomba Munu masa.”

Yandi tubaka, “Wapi mutindu Nge ke baka yawu? Dibulu ya maza kele mudindu, mpe Nge kele na kima ve ya kubakila.”

151 Yandi tubaka, “Masa yina mu ke pesa kele Masa ya Luzingu, yina ke nakukota na Luzingu ya Kukonda nsuka.”

Yandi zonzaka na yandi tii Yandi monaka mutindu ya yandi vwandaka. Mpe na yina. . . Beno tala mbote yina Yandi tubaka na yandi ntangu yayi, “Kwenda baka bakala ya nge mpe beno kwiza awa.”

Mpe yandi tubaka, “Mu ke na bakala ve.”

152 Yandi tubaka, “Nge me tuba kieleka, samu nge vwandaka na tanu, mpe yandi yina nge ke na kuzinga ntangu yayi kele ya nge ve. Na yawu, na yayi, nge me tuba kieleka.”

Beno tala luswaswanu na kati-kati ya kento yina mpe nkonga ya banganga-Nzambi yina. Yandi zabaka mingi na yina me tala Nzambi kulutila nkonga nyonso ya banganga-Nzambi yina kusalaka, kintwadi.

153 Yandi tubaka, “Tata, mu ke tala ti Nge kele Profete.” Yandi tubaka, “Beto me kuzwa mosi ve bamvula nkama yiya. Ntangu yayi, beto zaba ti Mesiya ke kwisa. Mpe ntangu Mesiya ke kwisa, yawu yina Yandi ke sala.” Yina vwandaka kidimbu ya Mesiya, samu Yandi vwandaka Mwana ya muntu. Yandi tubaka, “Ya kele yina Yandi ke sala ntangu Yandi ke kwiza. Nge fwana vwanda profete ya Yandi.”

154 Yandi tubaka, “Mu kele Yandi.” Muntu yankaka ve lendaka tuba yawu.

155 Yandi losaka dibungu yina ya masa mpe kwendaka mbangu na kati ya yinsi, mpe tubaka, “Kwisa, tala Muntu Yina me tuba na munu yina mu salaka. Yayi kele ve Mesiya ya kieleka?”

Ntangu yayi beno bambuka moyo, Yandi silaka na kusala kima ya mutindu mosi na nsuka ya bantu ya makanda.

Ba-Juif vwandaka na bamvula mafunda yiya ya kutala Mesiya yina, bamvula mafunda yiya ya malongi yina Yandi vwandaka kwiza, mpe yina Yandi zolaka sala ntangu Yandi kumaka kuna, mpe bawu lembanaka na kumona Yandi, to kondwaka na kundima yawu. Mpe ntangu Yandi kukitalisaka Yandi mosi na bampova ya kieleka ya Biblia ti Yandi tubaka ti Yandi ke sala yawu, ntangu Yandi vwandaka théophanie mpe

kuna kumaka nsuni mpe zingaka na kati-kati ya bawu, bawu lembanaka na kumona yawu, mpe bokilaka bisalu ya Yandi bisalu ya dyabulu.

¹⁵⁶ Ntangu yayi, beto me kuzwa bamvula mafunda zole ya malongi. Na kulutaka na Dibuundu ya Katolika ya Rome, na manima ya bantumwa. Na manima beto me mona Katolika ya Rome, Grec, mpe nyonso yankaka yina, tii na nsungi ya Luther, mpe ya Wesley, yinki dyaka, bankama yivwa ya ba-organisation. Na kukulumukaka, bawu vwandaka na bansungi nyonso yayi, malongi.

Ntangu yayi Yandi silaka, kaka ntete ntangu ya nsuka kukwiza, ti kizizi ya Sodome mpe Gomorrhe ke vutuka dyaka, “Mutindu ya vwandaka na bilumbu ya Sodome, mutindu mosi ya ke vwanda na nkwezulu ya ntangu ya nsuka, Mwana ya muntu ke monana dyaka Yandi mosi.” [Kisika ya mpamba na bande—Mu.]

“Kasi na mwa ntangu fioti mpe yinza ke mona Munu diaka ve; kasi beno ke mona Munu, samu Mu,” kiyingilu kimuntu, “Mu ke vwanda na beno, mpe na kati ya beno, tii nsuka ya bima nyonso, nsuka ya yinza. Mu ke vwanda na beno.” Yandi kele mutindu mosi mazono, bubu yayi, mpe kukonda nsuka. Beno me mona?

¹⁵⁷ Beno me mona, *Samaritain* vwandaka, kieleka, na dilongi ya munu ya mazono na nkokila, vwandaka Agar, beno me mona, kifwanikusu ya kubeba. *Juif* vwandaka Sarah, to vwandaka Sarah ya ntwenia. Kasi *Muntu ya makanda* kele ya Marie, Nkuna ya Kimfumu, Nkuna ya Kimfumu ya Abraham.

¹⁵⁸ Ntangu yayi ba silaka yawu na bilumbu yayi ya nsuka, ti, Nzambi mosi yayi, Klisto mosi yayi, ke vutuka awa mpe ke monisama Yandi mosi mutindu Mwana ya muntu.

Samu na yinki? Yandi kele mutindu mosi mazono, bubu yayi, mpe kukonda nsuka. Mpe kana Yandi zolaka bika ba-Juif yina kuluta, na . . . mpe kupesa bawu kidimbu yina ya Bumesiya, mpe na manima kumaka na nsuka ya malongi ya Bantu ya makanda mpe ti bawu kwenda kaka na théologie, Yandi ke vwanda ya kusungama ve. Yandi fwana sala kima mutindu mosi, samu ti Biblia ke tuba, na makumi tatu na . . . Hébreux 13:8, “Yandi kele mutindu mosi.”

Mpe Yandi silaka na Malachie 4, mpe Masonuku nionso ya luswaswanu, ti, bilumbu ya nsuka, dibuundu ke vwanda kaka kieleka mutindu ya kele bubu yayi, mpe yinza ke vwanda.

¹⁵⁹ Beno tala yinza bubu yayi. Beno tala mutindu ya Sodome. Beno tala kuningana ya ntoto na bisika mingi, mpe bima yina ke na kusalama. Beno tala dibuundu mpe mvindu yina kele na kati, ya Babylone. Beno tala munati-nsangu na yawu, Oral Roberts mpe Billy Graham.

G-r-a-h-a-m, ntangu ya ntete beto me kuzwa munati-nsangu mosi, na mabuundu nionso, yina nkumbu ya yandi me sukaka ntete ve na h-a-m, mutindu Abraham. A-b-r-a-h-a-m kele na bisono sambwadi. G-r-a-h-a-m kele na bisono sambanu. Wapi kisika yandi kele? Na yinza. Sambanu kele ntalu ya muntu. Muntu vangamaka na kilumbu ya sambanu. Kasi sambwadi kele ntalu ya Nzambi.

¹⁶⁰ Ntangu yayi beno tala bawu kuna na Sodome. Mpe ya kele na minati-nsangu ya bawu kuna yina ke na kuzonzaka na bawu.

Kasi na yina wapi kisika kele Nkuna yango ya kimfumu ya Abraham? Wapi kisika kele kidimbu ya bawu? ti Yandi tubaka, “Mutindu ya vwandaka na bilumbu ya Sodome,” ti Nzambi kulumukaka mpe monisamaka na nzutu ya muntu, mpe tubaka na yinki Sarah vwandaka banza na manima na kati ya ntima ya yandi, na kati ya tenta na manima ya Yandi: kidimbu ya nsuka na ntuala yinza ya Bantu ya makanda kubeba na nzila ya tiya.

Mpe Dibuundu kele na kidimbu ya Yawu ya nsuka na ntuala yinza ya muvimba kubeba, kimfumu yayi ya Bantu ya makanda ke beba na tiya mpe nganzi ya Nzambi. Beno ke kwikila yawu?

¹⁶¹ Ti Melchisédek vwandaka nsuni, vwandaka monikisa Yandi mosi na kati ya nzutu ya muntu; mpe kuna na manima Yandi kumaka nsuni. Mpe ntangu yayi, na nkokila yayi, Yandi kele mutindu mosi, mazono, bubu yayi, mpe kukonda nsuka. Beno ke kwikila yawu?

¹⁶² Nani kele Melchisédek yayi, na yina, ya kele mutindu mosi mazono, bubu yayi. . . “Ata mbala mosi ve ti Tata, kuzwaka ata mbala mosi ve mama; Yandi kuzwaka ata mbala mosi ve mbandukulu ya bilumbu, Yandi kuzwaka ata mbala mosi ve nsuka ya luzingu.” Mpe Yandi kutanaka na Abraham, mpe wapi mutindu ya kidimbu Yandi salaka? Na yina ntangu Yandi kumaka muntu, Yandi tubaka ti ya ke salama dyaka kaka ntete ntangu ya nsuka. Beno ke kwikila yawu? Mu ke kwikila yawu.

Beto sambila.

¹⁶³ Nzambi ya luzolo, mu ke kwikila Masonuku, ti Nge me tuba ti Nge vwandaka “mutindu mosi mazono, bubu yayi, mpe kukonda nsuka.” Mpe ya kieleka na kati ya ntima ya munu, Mfumu, mu zaba ti kima mosi zola salama. Mu lenda ve kutalisa yawu pwelele. Mu kele na boma ya kutuba kima mosi, Mfumu. Nge zaba ntima ya kisadi ya Nge.

¹⁶⁴ Mpe bambala yikwa, nzila nyonso ya nsungi ntangu Nge fidisaka bima, bantu lembanaka na kuzwa yawu. Muntu ntangu nyonso ke kumisaka Nzambi samu na yina Yandi salaka, mpe ke tubaka yinki bima ya nene Yandi ke sala, kasi na kuzabaka ve yina Yandi ke na kusalaka. Mutindu mosi ya vwandaka na nsungi. Samu na yinki dibuundu ya Rome kubwaka samu na kumona Santu Patrick mutindu profete ya Nzambi? Samu na yinki bawu kufwaka Jeanne d’Arc? ntangu yandi vwandaka

profete ya kento, ba yokaka yandi mutindu ndoki. Tata, ntangu nyonso ya me lutaka. Nge ke bumba yawu na meso ya bantu ya ndwenga mpe ya mayela. Kuyituka ve ti Nge tubaka na banganga-Nzambi yina, “Beno ke lengula bantoni ya baprofete, mpe beno kele bayina tulaka bawu na kati kuna.” Na manima bawu me kwenda, bawu ke mona foti ya bawu. Bawu ntangu nyonso ke talisaka Nge mpasi, Mfumu, na mutindu nyonso Nge ke kota.

¹⁶⁵ Mu ke sambila, na nkokila yayi, Nzambi, kaka na ntangu mosi dyaka. Mbasi beto ke vwanda. . .kukwenda na Tucson. Bitini yankaka ya yinza, bambanza yankaka yina beto fwana longi. Kasi, Nzambi ya Luzolo, ya lendaka vwanda na banzenza awa na nkokila yayi yina me. . .Bawu me kuwaka Banginga kulungama, kasi me monaka Yawu me monisama pwelele ata fioti ve.

Mutindu mu yufulaka Nge na mbandukulu. Ntangu bilandi yina, Cléopas mpe nkundi ya yandi, katukaka na Emmaüs, vwandaka tambula na nzila, mpe Nge basikaka na mulaka mpe bandaka na kusolula na bawu, na manima ya mvumbukulu, longaka bawu. Samu na yinki, Yandi tubaka, “Bazoba, na lembami ya ntima. Beno zaba ve ti Klisto fwana tala mpasi na bima yayi, na manima kukota na nkembo ya Yandi?” Kasi dyaka bawu zabaka yawu ve. Kilumbu nyonso bawu tambulaka na Nge, mpe dyaka bawu zabaka Nge ve. Kasi mpimpa mosi. . .

Mpimpa me kwiza, bawu me tuma Nge na kukota. Ntangu ba kotaka na mwa yinzo ya fioti mpe kangaka bielo, na yina Nge salaka kima kaka mutindu Nge salaka yawu ntete ba koma Nge na kulunsi, mpe bawu zabaka ti ya vwandaka Klisto yina vumbukaka na lufwa. Na mwa ntangu fioti Nge vwandaka na manima ya ba-rido mpe kwendaka. Na nswalu bawu kwendaka mbangu mpe tubaka na bilandi, “Mfumu me vumbuka kieleka na lufwa!”

¹⁶⁶ Tata Nzambi, mu ke kwikila ti Nge kele dyaka moyo. Mu zaba ti Nge kele. Mpe Nge me siamisa yawu na beto bambala mingi. Nge lenda sala kaka yawu mbala mosi dyaka samu na beto, Mfumu? Kana beto kuzwa lemvo na meso ya Nge, ti ya salama mbala mosi dyaka. Mu kele kisadi ya Nge; bayayi kele bisadi ya Nge na kati awa. Mfumu, nionso yina mu me tuba lendaka ve kufwanana na. . .Kaka mpova mosi na Nge ke vwanda ya kulutila na yina mu me tuba na bankokila tanu yayi, to bansangu tanu. Ya ke vwanda ya kulutila, kaka mpova mosi me katuka na Nge. Nge lenda tuba ve, Mfumu, ti bantu kuzaba ti mu me tuba na bawu Kieleka? Pesa yawu, Nzambi. Mu ke lombi yawu na Nkumbu ya Yesu, yayi mbala mosi dyaka. Amen.

¹⁶⁷ Ntangu yayi, mu zaba nge ve. Mu zaba bantu yankaka. Mu zaba mwana-bakala yayi ya kuvwanda *awa*. Mu zaba Bill Dauch

yina kele ya kuvwanda kaka *kuna*. Mu zola . . . Awa kele Mpangi Blair, Rodney. Ya kele mpasi na kumona kuna.

Na lweka *yayi*, kaka na ntangu yayi mu lenda mona muntu ve, kieleka, yina mu zaba.

¹⁶⁸ Ntangu yayi bantu yikwa na kati awa yina zaba ti mu kele nzenza samu na beno? Beno telemisa maboko ya beno, beno zaba ti mu zaba kima ve na zulu ya beno, beno telemisa maboko ya beno na balweka nyonso zole.

Bantu yikwa na kati awa yina kele na kima ya yimbi, to kima yina beno zaba ti mu zaba kima ve samu na yawu? Beno zola telemisa maboko ya beno.

Ntangu yayi, ya ke vwanda nyonso ya muvimba, kieleka na mutindu nyonso yina lenda salama ve samu na munu na kuzaba kima na zulu ya beno. Na mutindu yankaka, kuna, ya zolaka katuka na luzayikisu mosi ya Mpeve.

Mpe na yina mu me tuba na beno bankokila nyonso yayi, mpe na nkokila yayi, ti Yandi kele ya kufwa ve; Yandi kele awa, mpe silaka na kusala kima mutindu mosi. Mpe silaka ti ya ke vwanda na ntangu mosi na bilumbu ya nsuka, landila Malachie 4 mpe landila Santu Luc, ti Yandi ke monika dyaka na mutindu ya kimuntu na kati-kati ya bantu ya Yandi mpe ke sala bima mutindu mosi, mpe ke monikisa kima mosi, kidimbu mosi ya Bumesiya. Bantu yikwa zaba yawu, beno mitangi ya Biblia, zaba ti ya kele Kieleka? Beno tuba, “Amen.” [Dibuundu me tuba, “Amen.”—Mu.] Ya fwana vwanda bawu nyonso kele mitangi ya Biblia.

¹⁶⁹ Ntangu yayi, mu zaba ti ya kele nzenza samu na bantu bubu yayi, kasi ya kele kaka Kieleka. Ya kele samu na yina bawu zabaka ve Yesu ya Nazareth. Bawu zabaka ba-credo ya bawu ya dibuundu, kasi bawu zabaka Yandi ve. Kasi Yandi kwizaka kaka mutindu Biblia ke tuba; muntu ya théologie ve, nganga-Nzambi ve. Yandi kwizaka mutindu Profete, mpe baya Yandi Mosi kuyambaka Yandi ve.

¹⁷⁰ Ntangu yayi, kana Nzambi ke zitisa Ndinga ya Yandi, mpe kana mu me . . . ya me salama na muntu yina mu zaba, na yina mu ke—mu ke kuzwa muntu yankaka. Beno me mona, mu zola muntu yina mu zaba ve. Mpe mu zola ti beno sambila.

¹⁷¹ Ntangu yayi, beno tala, ya vwandaka na mwa kento mosi na ntangu mosi yina vwandaka na kimbevo. Yandi bebisaka mbongo ya yandi samu na badokotolo; ba lendaka sala yandi mbote ve. Mpe yandi tubaka na kati ya ntima ya yandi, “Kana mu lenda simba bilele ya Muntu yina, mu ke beluka.” Beno ke bambuka moyo na disolo yango? Mpe na yawu bawu nyonso mekaka na kunata yandi na kuvutuka manima, kasi yandi pasulaka tii yandi simbaka lele ya Yandi, yandi vutukaka mpe kulumukaka.

¹⁷² Ntangu yayi beno kuwa mbote. Mpe kuna ntangu Yandi salaka yawu, ntangu yandi salaka yawu, Yesu balukaka mpe tubaka, “Nani me simba Munu?”

¹⁷³ Mbote, Pierre ntumwa sembaka Yandi. Yandi zolaka tuba kima mutindu, “Mfumu, kutuba ve kima mutindu yina. Bantu ke kwikila ti ya kele na kima mosi ke tambula mbote ve na Nge. Samu, ntangu Nge lombaka bawu na kudia nzutu ya Nge mpe kunwa Menga ya Nge, bawu ke banza ti kima mosi ke tambula mbote ve. Mpe Nge ke tuba, ‘Nani me simba Munu?’ Samu na yinki, bantu nyonso ke na kusimbaka Nge.”

¹⁷⁴ Yandi tubaka, “Yinga, kasi mu ke mona ti ngolo basikaka na Munu.” Yina vwandaka mutindu yankaka ya kusimba. Ntangu yayi, muntu nyonso zaba ti *vertue* kele “ngolo.” “Mu me lemba; ngolo me bika Munu.”

Mpe Yandi talaka bisika nyonso na kivinga tii Yandi monaka mwa kento yango, mpe tubaka na yandi samu na kubasika ya menga ya yandi. Mpe yandi waka na nzutu ya yandi ti menga yina basikaka. Ya kieleka? Mpe Yandi tubaka, “Lukwikilu ya nge me vulusa nge.”

Ntangu yayi, mpova ya Grec kele *sozo*, yina kieleka zola kutuba “yina me vuluka,” na nzutu to ya kimpeve, kaka mutindu mosi. Yandi “me vuluka.” Yandi kele—Yandi kele Mvulusi ya beno.

¹⁷⁵ Ntangu yayi, kana ya vwandaka Yandi mazono, mpe mutindu Yandi salaka, samu na kusiamisa ti Yandi vwandaka na kati-kati ya bantu, Mesiya silaka; mpe ya kele mutindu Yandi kukitalisaka Yandi mosi, mpe silaka na nzila ya Biblia, Yandi ke sala kima mutindu mosi ntangu yayi; Yandi zolaka ve—Yandi zolaka ve kusala kima mutindu mosi?

¹⁷⁶ Beno ke tuba, “Yandi tubaka samu na kubeluka ya bambevo?” Yinga!

Ba-Hebreux, Biblia yina mu me tanga, tubaka ti, “Yesu Klisto ntangu yayi kele Nganga-Nzambi ya beto ya Mbuta yina lenda simbama na bansatu ya bimbevo ya beto.” Bantu yikwa zaba ti ya kele kieleka? Biblia me tuba yawu. “Yandi kele Nganga-Nzambi ya Ntete ntangu yayi yina lenda simbama na bansatu ya bimbevo ya beto.” Na yina kana Yandi kele Nganga-Nzambi mosi ya Mbuta yina Yandi vwandaka kuna, wapi mutindu Yandi ke sala ntangu yayi? Yandi zolaka sala mutindu mosi Yandi salaka kuna, kana Yandi kele Nganga-Nzambi mosi ya Mbuta. Ntangu yayi, beno lendaka . . .

Mu kele ve Nganga-Nzambi ya beno ya Ntete. Beno lenda simba munu, mpe ya ke vwanda kaka mutindu kusimba bakala ya beno, to mpangi ya beno ya bakala, to nyonso yankaka, muntu.

¹⁷⁷ Kasi beno bika lukwikilu ya beno kusimba Yandi, mpe beno tala yina ke salama. Ntangu yayi, kana mu kele kisadi ya Nzambi mpe me tuba na beno Kieleka, Nzambi ke siamisa ti ya kele Kieleka. Mpe yina ke lakisa ti Yesu Klisto ke na kuzinga na nokokila yayi, ya kutelama awa. Ya kele kieleka?

Ntangu yayi, beno vwanda na lukwikilu, kaka lweka mosi na ntangu mosi, na lweka mosi. Beno vwanda na lukwikilu kuna. Mu ke sala mbote na kuvwanda na microphone awa, samu ba lendaka ve kuwa munu.

¹⁷⁸ Muntu mosi ke tala kaka na Nzambi, mpe ke tuba, “Nzambi, muntu yina zaba munu ve. Yandi zaba kima mosi ve samu na munu. Mu kele nzenza ya kulunga samu na yandi. Kasi bika lukwikilu ya munu kusimba Nge, Mfumu. Mpe Nge zaba yina kele dyambu na munu, Mfumu. Nge zaba nionso samu na munu. Nge zaba nani mu kele, mutindu mosi Nge zabaka nani Pierre vwandaka, mutindu mosi Nge zabaka Nathanael, mutindu Nge zabaka yina vwandaka tambula ve mbote na kento yina vwandaka basika menga. Mpe muntu yayi ke tuba na munu ti Nge kele ‘mutindu mosi mazono, bubu yayi, mpe kukonda nsuka.’ Na yina, Mfumu, bika lukwikilu ya munu kusimba Nge.”

Mpe kana Yandi ke sala yawu, mpe ke kukitalisa Yandi mosi ya kieleka awa, bantu yikwa na kati ya beno ke kwikila Yandi na ntima ya beno ya muvimba; kana Yandi ke sala yawu na kutala mosi, to zole, to bantu tatu, samu—samu na mbangi? [Dibuundu me tuba, “Amen.”—Mu.] Nzambi sakumuna beno.

¹⁷⁹ Ntangu yayi, Tata Nzambi, yayi kele nyonso na ngaanda ya maboko ya muntu nyonso. Ya fwana vwanda diambu ya ngitukulu ya kimpeve. Na yawu mu ke sambila ti Nge sadisa munu ntangu yayi, Mfumu. Mu kele na maboko ya Nge. Sala na munu mutindu Nge me mona ya kulunga. Na Nkumbu ya Yesu. Amen.

¹⁸⁰ Ntangu yayi, beno vwanda ve ya kudasuka. Beno vwanda kaka ya kulemvuka, na buzitu nyonso beno tuba, “Mfumu, mu ke sadila Nge. Mpe ya ke vwanda kieleka, ti, kana mu lenda simba lele ya Nge, na yina Nge ke vutula mvutu na nzila ya muntu yina. Yina ke talisa na munu ti yina yandi tubaka kele Kieleka.” Ya kieleka?

¹⁸¹ Bantu yikwa me monaka foto ya Nsemo yina? Ya kele bisika nyonso na yinsi, bisika nyonso. Science me baka yawu mpe me tala yawu, mpe bisika nyonso. Ntangu yayi, Yandi kele kaka awa ntangu yayi; Yandi yina mosi tubaka samu na *Makwela Mpe Kufwa Makwela*, Yandi yina vwandaka na zulu ya mongo, me ningisa myongo kuna na manima, Yandi yina vwandaka awa na nzadi na mvula 33, mutindu mosi mazono, bubu yayi, mpe kukonda nsuka. Yandi kele mutindu mosi.

¹⁸² Ntangu yayi, ya kele na kento mosi, mpe yandi zaba ntangu yayi ti kima mosi me salama. Nsemo yango kele kaka ya

kunamika na zulu ya yandi. Yandi kele ya kuvwanda kaka *awa*, ke toka, to kima mosi. Mu zaba kento yayi ve. Mu banza ti beto kele banzenza mosi na yankaka. Ya kieleka. Nge ke kwikila ti Nzambi. . . Nge kele—nge kele na nsatu ya kima mosi, mpe nge ke kwikila ti Nzambi lenda monisa na munu yina kele mpasi ya nge? Mpe kana Yandi sala yawu, na yina beno zaba ti ya fwana vwanda ngolo ya mazulu, samu ti mu zaba beno ve. Mpe ya fwana katuka na kimpeve.

Ya me tala na yina beno ke banza. Beno lenda baka lweka ya beno na nganga-Nzambi, kubokila yawu “dyabulu,” to beno lenda baka lweka na mukwikidi mpe kubokila yawu “Nzambi.” Ntangu nyonso yina beno ke kwikila, ya kele kisika musendo ya beno ke katuka.

¹⁸³ Kana Nzambi ke monisa na munu mpasi ya nge, nge ke ndima Yandi mutindu kukatula-masumu ya nge—ya nge samu na mpasi yina? Mu zaba ve yina kele mpasi. Kasi mu zaba, mpe beno zaba, ti kima mosi ke salama.

¹⁸⁴ . . . Ntangu yayi, beno bika kaka mu tuba na beno mutindu beno ke kuwa na nzutu, mpe kuna beno ke zaba: tiya ya kieleka, ya mbote, ya lembami, ya kitoko. Mu ke na kutalaka kaka na Yawu. Ya kele Nsemo yango, Nsemo ya mbwaki ya kunamika na zulu ya kento.

Mpe mama yango kele na mpasi na kimbevo na kifundu ya yandi. Ya kele mutindu ya kuvimba, mutindu, na kifundu ya yandi. Yandi kele awa ve. Ve. Nge me katuka ntama na awa mutindu yina ve? Ya kieleka. Nge kele ya Wisconsin. Ya kele kieleka? Kieleka. Ntangu yayi beno me beluka. Lukwikilu ya nge me belusa nge.

¹⁸⁵ Ntangu yayi beno tuba na munu Nani kento yayi me simba. Mu kele na ba-metre makumi zole na tanu na yandi. Yandi simbaka Yesu Klisto, Nganga-Nzambi ya Ntete. Beno ke kwikila yawu?

¹⁸⁶ Mu ke tala kento yina mu zonzaka. Kento yayi, mu ke na kutalaka kaka na yandi, samu ti yandi ke na kusambila ngolo mingi samu na bakala. Yandi tubaka na munu ti yandi vwandaka na bakala mosi. . . Yandi tubaka na munu kima mosi ve samu na yawu.

Kasi nkumbu ya yandi kele Mama Waldrop. Yandi me katuka na Phoenix. Yandi vumbukaka na lufwa, mpe dokotolo ya yandi kwizaka na minzenzi ya ladyo mpe lakisaka cancer na kati ya ntima. Yandi kufwaka na mulonga ya bisambu. Bilumbu yikwa me luta ya me vwanda, Mama Waldrop? Bamvula kumi na nana me luta, mpe yandi yina kuna na nkokila yayi, kimbangi ya moyo. Dokotolo ya yandi kwizaka na lukutakanu, yandi nataka. . . Yandi tubaka, “Wapi mutindu kento yango lenda zinga?” Kasi yandi yayi, mpe ata kidimbu ya yawu ve.

¹⁸⁷ Yandi me nata muntu mosi, mpe yandi ke sambila samu na yandi. Ntangu yayi, yandi ke na kufwa, na diabete. Ntangu yayi, yina mu zabaka. Kasi na yina nge ke sambila. . . Nge zaba ti mu zaba ve nani yandi kele, Mama Waldrop.

¹⁸⁸ Yandi me katuka na Missouri, mpe nkumbu ya yandi kele Tata Cooper. Ya kele kieleka. Ntangu yayi, nge ke kwikila, nge lenda vutuka na yinzo mpe beluka, tata. Ya me tala nge, kana nge ke kwikila yawu.

¹⁸⁹ Awa kele kento mosi, mpe yandi kele na mpasi ya asthme, minianga. Yandi kele awa ve. Yandi kele ya kuvwanda kuna na kati ya nkonga ya bantu, kaka *kuna*. Mu banza ti yandi ke. . . Yandi me katuka awa ve. Yandi me katuka na Georgie. Mademoiselle McKinny. Nge ke kwikila na ntima ya nge ya muvimba, mpe ke kwikila ti Nzambi ke belusa nge? Telama, kana nge ke nzenza samu na munu mpe ya kele kieleka. Yesu Klisto ke belusa nge. Nge ke kwikila?

¹⁹⁰ Na mukongo ya munu, ya kele na muntu yina kele ya kuvwanda na manima ya munu. Yandi ke na kusimba Nzambi. Mpe yinki ya kele, yandi ke zola, yandi kele na bébé yina kele na mpasi ya ntima. Mpe bébé yina kele na kuniunguta na kati ya ntima ya yandi, na yina dokotolo tubaka. Mpe nkumbu ya bakala yina kele Tata Cox. Telama, Tata Cox. “Mpe Yandi tubaka na Sarah yina yandi vwandaka banza, na manima ya Yandi.”

¹⁹¹ Kaka na lweka yankaka ya yandi ya couloir, na manima ya mwa ntangu fioti, ya kele muntu yina me katuka awa ve, kasi na New Mexico. Mu me monaka yandi ata fioti ve, na luzingu ya munu. Mu ke tala kaka yandi na ntangu yayi, mpe yandi kele na manima ya munu. Yandi kele ya New Mexico. Mpe bakala yayi kele na mwana-kento yina yandi ke sepela, mpe mwana-kento kele na kima ya yimbi na yinwa ya yandi. Ya kele. . . Kima na yinwa ya yandi kele yina kele yimbi. Mpe nkumbu ya bakala yango kele Tata West. Nge zola kutelama, tata. Mu kele nzenza ya muvimba samu na yandi, kasi Mfumu Nzambi ke belusa mwana ya yandi.

¹⁹² Beno ke kwikila ntangu yayi na ntima ya beno ya muvimba? Bantu yikwa na kati ya beno ke kwikila ntangu yayi na ntima ya beno ya muvimba? Ntangu yayi, Yesu Klisto kele ve mutindu mosi mazono, bubu yayi, mpe kukonda nsuka? Beno ke ndima Yandi ntangu yayi mutindu Mvulusi ya beno? Beno telemisa diboko ya beno. Beno ke kwikila na Yandi mutindu Munganga ya beno?

¹⁹³ Awa, awa kele na muntu ya kuvwanda awa, kikata to kima mosi, yina kele ya kulala na mbeto ya bambevo.

Beno lenda kuwa munu na nzila ya micro yayi? Mu zaba nge ve. Nge kele kaka kento mosi ya kulala kuna. Kana mu lenda belusa nge, mu ke sala yawu. Mu lenda belusa nge ve.

Mbote mingi. Ya kele kaka muntu yina ke sepela. Mwana ya yandi belukaka.

Mu zaba nge ve. Nge kele kento, mpe mu kele bakala. Yayi kele mbala ya ntete beto me kutana na luzingu, mu banza. Bantu yayi . . . ? . . . yina me nata nge. Ya kieleka, yayi kele mbala ya nge ya ntete awa; me nata nge kaka na kati. Nge me katuka ntama mingi. Nge me fikama na kivudi ya lufwa. Nge ke na cancer. Ya kele ve kibukata. Ya kele cancer. Badokotolo lenda dyaka ve kusala samu na nge. Ya kele kieleka. Mpe nge kele kieleka ya kufwa; badokotolo yina lenda dyaka ve kusala samu na nge.

¹⁹⁴ Kilumbu mosi ya vwandaka na bambevo tatu ya wazi yina vwandaka na mwelo ya Samarie. Mpe bambevo yayi ya wazi tubaka, “Samu na yinki beto me vwanda awa tii kuna beto ke kufwa?” Samu na bimbevo nionso, bantu vwandaka kufwa, mpe vwandaka kudia bana ya mosi na yankaka. Bawu tubaka, “Kana beto kulumuka na camp ya mbeni, bantu ya Syrie; kana bawu kufwa beto, beto ke kufwa, na mutindu nionso. Mpe kana bawu vulusa beto, beto ke zinga.” Mpe bawu bakaka siansi yina. Mpe, na nzila ya lukwikilu yina, bawu vulukaka kaka bawu mosi ve kasi kimvuka ya movimba.

¹⁹⁵ Ntangu yayi, beno ke kufwa kana nge vwanda kuna. Kasi ba me lombana nge ve na kukwenda na camp ya mbeni. Kasi ba me bokila nge na yinzo ya Tata, . . . ? . . .

¹⁹⁶ Nge ke na kufwa na cancer. Nge lenda zinga ve na ngaanda ya Nzambi. Nge me katuka ve na mbanza yayi. Nge me katuka awa ve. Nge me katuka ntama mingi. Nge me katuka na Milwaukee. Ya kele kieleka. Ya kele kieleka. Mu monaka mbanza. Mu zaba yawu. Ya kele kieleka.

Nge ke kwikila? Nge ke ndima Nzambi ntangu yayi mutindu Munganga ya nge? Kana nge ke kwikila, ata ti nge kele ya kulemba, wapi mutindu nge kele ya kukangama na mbeto, mu ke kwikila, na kisika ya nge, mu ke telema na Nkumbu ya Yesu Klisto. Mpe mu ke baka mbeto yina ya bambevo mpe mu ke vutuka na yinzo, mpe kuzinga samu na nkembo ya Nzambi. Nge zola kutumama na munu, mutindu profete ya Nzambi? Na yina telama mpe kwenda. Vwanda mbote! Kuvwanda na boma ve. Telama na mbeto; Nzambi ke belusa nge. Beno me mona?

¹⁹⁷ Muntu mosi ke simba yandi samu ti yandi lenda kutelama mpe kuzwa ngolo. Nge ke kwikila Nzambi? Bika yandi kuzwa ngolo ya fyoti; yandi ke vwanda mbote mingi. Ya kele yawu, Mpangi ya kento. Yandi yayi, na Nkumbu ya Mfumu Yesu!

Beto telama mpe beto pesa lukumu na Nzambi. Yandi kele mutindu mosi mazono, bubu yayi, mpe kukonda nsuka!

Kwenda, mpe Mfumu Yesu Klisto sakumuna nge. Vwanda na mavimpi ya mbote.



NANI KELE MELCHISEDEC YAYI? KNG65-0221E

(Who Is This Melchisedec?)

Nsangu yayi ya Mpangi William Marrion Branham, kulongamaka na Kingelesi, na Lumingu na nokokila, na kilumbu ya 21 ya Ngonda ya zole, na mvula 1965, na Parkview Junior High School na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org